



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



## A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

## Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.


Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

## À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>





104652



FROM THE LIBRARY OF  
**HUGO PAUL THIEME**  
PROFESSOR OF FRENCH  
1914 — 1940  
HIS GIFT TO  
**THE UNIVERSITY OF MICHIGAN**


81188-104652 1940

PQ

162

TX

1000



LES FLÉGIS

ou LA

# BELLE FILLE

lamentant sa virginité perdue

PAR

FERRY JULYOT

RÉIMPRESSION COMPLÈTE

DE L'ÉDITION PRINCEPS (1557)



PARIS

LÉON WILLEM, ÉDITEUR

2, rue des Poitevins, 2

1883





LES ÉLÉGIES  
DE LA  
BELLE FILLE

### *Justification du Tirage*

100 exemplaires, papier de Hollande, nos 1 à 100  
350 exemplaires, papier vélin, nos 101 à 450

N° 

LES ÉLÉGIES  
DE LA  
BELLE FILLE

lamentant sa virginité perdue

PAR  
FERRY JULYOT  
RÉIMPRESSION COMPLÈTE  
DE L'ÉDITION PRINCEPS (1557)



PARIS  
LÉON WILLEM, ÉDITEUR  
2, rue des Poitevins, 2

1883



24

H. P. Thieme  
2-20-41



## PRÉFACE

**F**ERRY JULYOT, l'auteur du très rare et très curieux opuscule que nous réimprimons pour la seconde fois, était probablement notaire à Besançon : ce qui ne l'empêchait de rimer aussi galamment qu'un Marot ou qu'un Saint-Gelais. Ses vers ont une saveur particulière : curieux au point de vue de la langue et du rythme et aussi

sous le rapport des mœurs franc-comtoises au XVI<sup>e</sup> siècle. Il aimait fort sa province, l'auteur des *élégies*, et plus d'une fois, dans ses vers, les lecteurs trouveront l'éloge de Besançon, sa bonne ville. Dès le début il lui adresse une « Epistre dédicative » et c'est là que sont exposées les raisons qui l'ont porté à mettre au jour ses *Elégies* :

Et puisque Dieu (mon seigneur) m'a fait naistre  
En toy : pour toy, me veux faire cognoistre.  
Non que je sois, par tant presumptueux,  
De m'estimer en savoir sumptueux.  
Vivre à demy, pour rien mettre en lumiere  
Digne de voir : mais bonté coustumièr  
Excusera un enfant qui prent cure  
Louër le lieu bon de sa géniture.  
Souz cest espoir et telle confidence  
Ce mien livret (sans vaine outrecuidance)  
Dédié t'ay, noble cité d'empire.

Plus loin, Ferry nous apprend dans la même *Epistre dédicative à la cité impériale de Besançon* qu'il avait bien d'autres poésies sur le chantier :

Pour l'advenir, autre chose conspire

Excuse moy, en mon simple exposé  
Jusques à ce que seray disposé  
Chanter plus haut en gente poésie.

Que sont devenues les *conspirations* de Julyot, si tant est, qu'il ait conspiré ! Peut-être craignait-il de mettre au jour ces poésies inconnues : ou ne fut-il jamais *disposé* ? Nous avons vainement cherché dans les bibliographies et les histoires locales ; nous n'avons pu trouver trace de ces projets ambitieux. Ne le regrettons pas : Ferry n'était pas de taille à « chanter plus haut » que les *Elégies*.

Le poète d'ailleurs ne s'est sauvé de l'oubli que ces toutes récentes années. Un érudit aussi consciencieux qu'éminent, M. Courbet, a réhabilité, à deux reprises différentes, les *Elégies* de son compatriote franc-comtois. Mais il n'a pu, malgré les recherches les plus profondes, nous donner une biographie. Le dédain s'était fait depuis le XVI<sup>e</sup> siècle sur Julyot. La Croix du Maine



et du Verdier l'avaient oublié dans leurs *bibliothèques* et ce n'est que dans les premières années du dix-neuvième siècle, qu'il apparaît pour les biographes. Weiss, son compatriote, lui donne place dans la *biographie Michaud* et le premier, il rend justice à notre auteur.

Le peu que nous savons sur sa vie, nous l'avons trouvé dans son livre. Comme tous les poètes, Julyot a pris soin d'adresser à ses amis quelques pièces de vers. En premier lieu « à messire Charles du Molin, de Paris, docteur ès droictz très nommé. » Le célèbre jurisconsulte Dumoulin avait été le maître de Julyot, quand il enseignait le droit à l'université de Dôle : il était depuis devenu son ami. Aussi nous est-il narré dans la pièce qu'il a incité le tabellion-poète à mettre au jour ses œuvres. Mais le véritable ami de Julyot, qui lui donne pour son recueil quelques poésies, qui fait les frais de l'impression des *Elégies*, c'est l'écuyer An-

toine Ludin dont le nom se voit au bas du titre. Le poète le remercie de sa générosité en lui dédiant une poésie, une des meilleures du recueil. Julyot comptait bien d'autres amis. Il fréquentait toute la haute société bisontine ; les Valimberg qui tenaient les monnaies, le commandeur du Temple Mathieu de Masso qui collabore, ainsi que Ludin et l'imprimeur Estauge, à la partie poétique du recueil : les notaires Pierre Fournier et Jean Renaud, les frères Jean et François Malarmé, le seigneur Estienne Sauget. Le reconnaissant auteur ne dédie pas seulement des vers à ses amis ; il en offre à ses anciens maîtres. C'est d'abord « maistre Estienne Desprez, le recteur, son premier précepteur ès lettres, au pré duquel il s'est repeu » et « discrete personne messire Bonaventure Junot, prestre, son maître en escripture et pratique ». Il en dédie aussi à maistre Jean Champfroid qui « a presté des livres. » Pourquoi n'en

a-t-il dédié à son confrère Jacques Estauge!

## II.

*Les Elégies de la belle fille, lamentant sa Virginité perdue avec plusieurs Epistres, Epigrammes, Instructions et traductions morales* paraissaient en 1557. Estauge et Ludin les tiraient à petit nombre et les rares exemplaires s'envolaient en présents. Aussi les *Elégies* sont-elles introuvables.

Trois exemplaires en sont seuls connus. Deux à la bibliothèque de Besançon : mais l'un, incomplet du titre et des pages 7 et 8 : l'autre, au contraire, superbe d'intégrité. Un seul exemplaire figure dans les collections particulières, célèbre dans les annales des ventes. Nodier, cet infatigable trouveur de raretés, en avait senti tout le mérite lorsqu'il le vit chez son ami du Bouvot et se l'était fait donner par ce généreux bibliophile. Il en faisait grand cas, et la note suivante

prouve de sa haute estime pour les *Elégies* :

« Livre d'une grande rareté, puisqu'on n'en connoît jusqu'ici que deux exemplaires, dont l'un, qui fait partie de la riche bibliothèque de Besançon, ne subira jamais la chance des enchères. Il paraît par quelques vers de la fin de l'œuvre qu'elle se donnoit en présent et ce sont ordinairement les livres de cette espèce qui disparaissent le plus vite. Le volume contient 5 petites gravures en bois assez bien exécutées. Il a été imprimé par Jacques Estauge qui était établi plus tard à Strasbourg mais qui paroît avoir fait l'essai de ses presses à Besançon. C'est bien certainement avec les caractères de ce Jacques Estauge et ceux mêmes qui ont servi à l'impression de l'Elégie de Jullyot qu'a été exécutée la fameuse Epistre envoyée au Tigre de la France dont M. Brunet possède le seul exemplaire connu. Le précieux volume qui fait le sujet de

cet article m'a été donné par M. du Bouvot (1). »

Nodier ne se contentait pas de le signaler à la postérité : il lui faisait donner par Thouvenin, un habillement durable, digne du poète et de la rareté de son livre. Le célèbre relieur le couvrait de maroquin vert ; le doublait de maroquin bistre et semait à profusion les dentelles, les ornements, les filets.

A la mort de Nodier il se vendait *deux cents francs*, prix énorme pour l'époque. Il passait de chez Nodier chez Baudelocque. En 1850, il reparaisait de nouveau sur la table des enchères, pour ne se vendre que *cent vingt francs*. Il était vengé à la vente Yéméniz et le 18 mai 1867 M. Bancel l'achetait six cent trente cinq francs.

---

(1) Description raisonnée d'une jolie collection de livres par Ch. Nodier, n° 418, p. 168-169. Paris, Techener, 1844, in-8.

Les Elégies ne devaient pas en rester là, et le 10 mai 1882, à la vente de la bibliothèque de M. Bancel, elles atteignaient le chiffre de quatorze cent soixante francs, frais en sus.

C'est qu'en effet, l'œuvre de Julyot n'a pas seulement ce mérite de la rareté. Son livre est des plus curieux pour l'histoire de ce seizième siècle, encore si mal connue aujourd'hui. Des détails ignorés et très importants pour l'histoire des mœurs françaises se trouvent dans notre opuscule. Dans la troisième élégie où Nature répond aux imprécations de la belle fille, que de précieux renseignements sur les vêtements des femmes au seizième siècle :

Faut-il toucher après aux vestemens ?  
Veit-on jamais tant de muguetemens ?  
Tant de fatras ? en bombanceuse oultrance ?  
Qu'avx femmes faut ! et pour la demonstrance  
Ce n'est assez le chaperon porter  
Et de dorure honneste l'estinter :  
Mais le bonnet cloué et la plumette

Sus coiffe d'or, faut avoir en poupette.

. . . . .  
Après les gants faut couvrir la main tendre  
Convient piquer, couper broder ou fendre  
Que n'est assez : mais il faut la manchette  
Pendant devant, que pour rien ne s'achette,  
Et pour ne veoir le ventre que s'avale  
Ou qu'est enflé, la ronde verdugale  
Avec ses bords rouges et esendus,  
Fait à penser mains actes defendus.

C'était devant tous ces ornements que les *Belles Filles*, au seizième comme au dix-neuvième siècle, rendaient les armes : et il nous est très précieux de trouver dans les *Elégies* ces détails de haute curiosité.

Au point de vue littéraire, le mérite des *Elégies* est irréfragable. Des tournures de langue particulières à la Franche-Comté ; des hardiesses singulières de rythme assignent à Julyot une place honorable entre les poètes de son temps. Il y a, il est vrai, dans son œuvre un grand nombre de vers licencieux et des joyeusetés à l'infini : mais

le sujet ne s'y prêtait-il pas ? Quel est le poète qui n'a commis quelque péché semblable ?

---

La composition de cette préface était complètement terminée lorsque nous avons reçu le *Catalogue de la librairie Morgand, mois de mars 1883*. Nous avons retrouvé au numéro 8327 de ce catalogue, les *Élégies*. L'exemplaire de M. Bancel que le célèbre Trautz-Bauzonnet avait richement relié depuis la vente Yéméniz est décrit dans toute sa splendeur. Recouvert de maroquin bleu avec des milieux de feuillages : il est doublé de maroquin orange avec un semis de roses et de marguerites : habillement superbe digne d'un tel livre ! M. Morgand le met en vente au prix de *trois mille francs*.

Dans ce même catalogue nous avons trouvé un autre renseignement qui corrobore la note de Charles Nodier sur l'imprimeur des *Élégies*. Le maître bibliophile assurait que Jacques Estauge avait imprimé, outre les



*Élégies*, la fameuse *Épître envoyée au Tigre de la France*. M. Morgand a eu la bonne fortune d'avoir entre les mains, en même temps que les *Élégies*, l'*Épître envoyée au Tigre de la France*. Il a comparé minutieusement les caractères et les a reconnus semblables dans les deux livres, et affirme péremptoirement que les deux ouvrages sortent des presses du même imprimeur.

LÉON WILLEM.



# Elegies de la belle

fille, lamentant sa Virginité perdue : avec  
plusieurs Epistres, Epigrames, Instructions  
et traductions morales.

*Composees par Ferry Iulyot  
de la Cité imperiale de Bezanson.*

Le contenu uerrez au prochain feuillet.



Imprimé aux despens d'Antoine Ludin,  
escuyer, citoyen dudit Bezanson,  
au moys de Mars, 1557.

# IAQVE ESTAVGE A CHASCVN.

Ferry, Ludin, Masso aussi,  
 Ont fait ceste Poësie cy :  
 Mais Ferry ha fait pres que tout  
 Depuis le tiltre iusque au bout.

Or tous ceulx trois m'ont si bien pleu,  
 Qu'oncque refuser ie n'ay sceu  
 D'imprimer ceste Poësie.  
 Car ainsi que la maluaisie  
 Outrepasse tout autre uin,  
 Et les uulgaires le Latin :  
 Ainsi la uersification  
 Qui tient icy bonne mesure,  
 Et ha telle moralité  
 Que digne est d'immortalité,  
 A fait que l'ay mis soubz ma Presse,  
 Veu que nully elle n'opresse.  
 Car par tel bien, qu'on ne doit taire,  
 Pretens à chascun plaisir faire.

Prenez à grè donc ce qu'on peult,  
 Chascun n'ha pas cela qu'il ueult.

## *Enigme quadruple d'Estdage.*

A cinq, quatre est : et quatre en sept.  
 Vnze, cinq, sept : iuste, douze est.

## *Declaration du premier uers.*

*Premierement, où il y a cinq ou sept, il y a bien quatre. Secondement, le mot cinq ha 4 lettres : et le mot quatre 7. Tiercement, ce uers ha 30 lettres : et la 1 part de ce liure, 30 matieres.*

*Declaration du second.*

*Item les 3 premiers motz ont chascun 4 lettres, qui font 12. Ce uers ha 25 lettres, aussi la 2 part du liure ha 25 matieres.*

*Quartement, mettez ensemble 5, 4, 4, 7, 11, 5, 7, 12, et trouuerez 55, qu'est toute la somme des matieres de ce liure.*

## LA TABLE DE TOVT CE LIVRE.

La premiere partie ha 30 matieres.

1	<i>Dixain au Liure.</i>	
2	<i>Dixain au Lecteur.</i>	
3	<i>Dixain aussi au Lecteur, par Antoyne Ludin.</i>	0
4	<i>Dixain aux pucelles, par Matthieu de Masso.</i>	0
5	<i>Dixain au Liure, par ce dict Matthieu.</i>	0
6	<i>Epistre dedicatiue à Bezanson.</i>	
7	<i>Epistre consolatiue à Charles Molinet.</i>	
8	<i>Elegies de la belle fille. Avec dixains instructifz.</i>	1
9	<i>Elegie d'icelle à Nature.</i>	2
10	<i>Elegie de Nature à la dicte fille.</i>	3
11	<i>Elegie d'icelle fille à ses pere et mere.</i>	4
12	<i>Elegie des pere et mere à leur dicte fille.</i>	5
13	<i>Elegie d'icelle aux seducteurs amans,</i>	6
14	<i>Elegie des amans à la dicte fille.</i>	7
15	<i>Elegie d'icelle, reduisant le sens des precedentes.</i>	8
16	<i>Dixain aux ieunes pucelles, par le susdict Matthieu.</i>	0
17	<i>Dixain à icelles, par le mesme.</i>	
18	<i>Septain de la deuise de nostre auteur Ferry Iuliot.</i>	

- 19 *Traduction des tristes uers de Lactance.*
- 20 *Elegie deprecatieue pour les seigneurs de Bezançon.*
- 21 *Epistre familiere à l'escuyer Ludin.*
- 22 *Epistre à dame Anne Turgis.*
- 23 *Epistre au noble enfant Luquin.*
- 24 *Vers Latins audict Luquin.*
- 25 *La traduction d'iceulx en rime Francoise.*
- 26 *Epistre facetieuse à quelque mesdisante.*
- 27 *Epistre à dame Volee, suyuant son nom.*
- 28 *Cry ioyeux d'un abbé inuitant les siens à l'abbaye.*
- 29 *Epistre enuoyée aux escholiers de Dole.*
- 30 *Epistre du ieu d'arbaleste, à Claude Petremand.*

La seconde partie a 25 matieres.

- |    |   |    |
|----|---|----|
| 31 | <i>Douçain de bien et mal.</i>                              | 1  |
| 32 | <i>Vnçain excitatif du uendredi saint.</i>                  | 2  |
| 33 | <i>Diçain de commencement et fin.</i>                       | 3  |
| 34 | <i>Neufuein de mensonge et uerité.</i>                      | 4  |
| 35 | <i>Huittain d'un relieur de tonneaux.</i>                   | 5  |
| 36 | <i>Septain d'une désirant estre ditte belle.</i>            | 6  |
| 37 | <i>Sizain d'un qui uouloit estre premier es monstres.</i>   | 7  |
| 38 | <i>Quintain des uoyles que les dames portent.</i>           | 8  |
| 39 | <i>Quattrin d'un qui aymoît mieux le uin que les dames.</i> | 9  |
| 40 | <i>Quattrin d'un qui de chascun mesdisoit</i>               | 10 |
| 41 | <i>Septain d'une qui disoit son mary mourir en riant,</i>   | 11 |
| 42 | <i>Huittain d'icelle mesme.</i>                             | 12 |
| 43 | <i>Quattrin d'un qui se mocquoit d'un borgne.</i>           | 13 |
| 44 | <i>Huittain au recteur Estienne Desprez.</i>                | 14 |

45	<i>Huittain à Bonaventure Iunot.</i>	15
46	<i>Dizain à Matthieu de Massò.</i>	16
47	<i>Huittain à Pierre Fournier.</i>	17
48	<i>Dizain à Iean Malarmè.</i>	18
49	<i>Huittain à Franceoys Malarmè.</i>	19
50	<i>Huittain à Iean Renauld.</i>	20
51	<i>Huittain à Estienne Sauget.</i>	21
52	<i>Huittain à Iean Champroid.</i>	22
53	<i>Quattrin d'vn riche chiche.</i>	23
54	<i>Huittain d'vn qui reprenoit chascun.</i>	24
55	<i>Quattrin au Lecteur.</i>	25

Le tout par Ferry Iulyot, exceptè les quatre  
matieres en la premiere partie  
ainsi signées au bout o

FIN DE LA TABLE DE TOVT CE LIVRE.



# SENSUYVENT AV-

## CVNES ŒVVRES DE FERRY

Iulyot, où il y a cinquante cinq sortes de  
matieres. Dont ceste premiere part  
en ha trente, & la seconde  
uingt cinq.

## I

### FERRY IVLYOT A SON LIVRET *allant soubs la presse en France.*

P Etit liuret qu'en azard te ueux mettre  
En France aller, fontaine d'éloquence :  
Doubte tu point rencontrer quelque maistre  
Qui mocquera ta rustique loquence ?  
Non : ie le croy, pour ceste consequence :  
Sois humble & doulx dessoubs tes correcteurs,  
Les supplians estre tes protecteurs,  
Contre tous ceux, qui te porteront trongne.  
Si les Franceois tu as pour tes recteurs,  
Correct seras, retournant en Bourgongne.

## 2

### *Le liuret à l'humain Lecteur.*

H Vmain Lecteur, qui mon tiltre liras  
De premier front, tu prendras coniecture,  
Qu'en me lisant, chose tu n'éliras  
De grand proffit, soit en sens ou facture.  
Mais tu uerras auant longue lecture

Diuers abus du monde reprimer,  
 Louer uertu, et uice comprimer,  
 Où tu pourras profiter quoy que face.  
 Commencement ne conuient deprimer :  
 Aussi ne faut iuger selon la face.

*Antoine Ludin de Bezançon, Escuyer, au Lecteur.*

**S**I de uertu ueux sauoir le guerdon,  
 Et de pechè la seure recompance :  
 Lecteur amy lis ce liure habandon,  
 Que Iulyot te lache sans iactance :  
 Et tu uerras en sommaire substance,  
 Inuention de gentile facture.  
 Puis qu'en son lieu, le premier s'aduenture,  
 De son esprit heureux, nous faire part :  
 Il ne sera (comme ie coniecture)  
 En pris & loz, le dernier autre part.

Auge & dele. A. Ludin.

*Frere Matthieu de Masso Lyonnois commandeur  
 de Bezançon et d'Arboys, de l'ordre de la cheua-  
 lerie saint Iean, de Ierusalem,  
 aux pucelles S.*

o

**F**illes de cœur, qui tendez à honneur,  
 Et estimez uertu sur toute chose :  
 Du chapelet de fleur, plain de bonheur,  
 Que uous portez, plus precieuse rose,  
 Maistre Ferry Iulyot nous expose,



En motz dorez, & doctement le couche,  
 Combien de mal, l'œil, l'aureille, la bouche,  
 Et le beau corps, font à uirginité.  
 Lisez le bien, le faict de pres uous touche,  
 Pour uous tenir en uostre dignité.

*Le mesme commandeur de Masso au présent liure. o*

**T**U t'en uas dessoubs l'arbitrage  
 Et l'opinion d'un chascun :  
 De l'un faueur, de l'aulture oultrage  
 Pourras receuoir. C'est tout un,  
 Nul ne peult seruir le commun.  
 Fais à tous un mesme uisage :  
 Ris autant au fol, comme au sage :  
 Les enuieux feras creuer :  
 Et passeras par tout passage  
 Sans que nul te puisse greuer.

## EPISTRE DEDICATI- ve à la Cité Imperiale de Bezanson, par ledict Ferry Iulyot.

**T**Res prudemment les Romains gens antiques,  
 Ont desiré par leurs faictz autentiques,  
 En souuenir leurs loz rendre immortels :  
 Se cognoissans en corps estre mortels.  
 Ce n'est grand cas d'auoir humaine uie,  
 Qu'en un moment par mort l'on uoid rauie :

Si les uiuans, en leurs gestes ardu,  
 Apres la mort, ne sont uiuans rendus.  
 Ce qu'ha causè tant de faicts heroïques,  
 A nous laisser aux antiques chroniques,  
 Car ceux ayant tant heroïquement  
 Cà bas uescu, sont autentiquement  
 Par gens sauans, citez & memorez  
 Comme uiuans, s'ilz estoyent demourez.

Tu le says bien (antique Bezanson)  
 Cité doree, ayant le bruyt & son,  
 Estre le chef de la franche Bourgoigne  
 Ainsi comment le bon Cesar tesmoigne,  
 Ayant de toy en comment recità,  
 Autant qu'affiert à celebre cité :  
 Et à cité florissante en police,  
 Pres de uertu, loing d'hayneuse malice.

Et si parler de la Bourgoigne faut,  
 Lon trouuera le sien loz, sans defect,  
 Bien amplement par escript ueridique,  
 En l'histoire sainte Ecclesiastique,  
 Où nous trouuons Bourgoigne l'ancienne,  
 Premiere auoir receu la loy chrestienne  
 Auant Francoïis bien soixante & cinq ans,  
 Selon que gens sauans sont practiquans.  
 Aussi l'escrit sans dissimule ou ris,  
 Molinaeus docteur, né de Paris,  
 Bien grauement au premier du proëme,  
 Qu'à Dole fait lisant en droit supreme.

Le Roy Clouys qu'à femme heut la princesse  
 Dame Clotys de Bourgoigne, print cesse  
 D'estre idolatre à l'enhortement d'elle.  
 Dés lors deuint doulce France fidelle :

Annichillant toute Payenne secte  
 Pour ensuyuir de Christ la Loy directe.  
 Dont bien deuoyent Franceois & Bourguignons  
 Sincerement s'aymer en compagnons,  
 Quand l'un par l'autre, en salubre moyen,  
 Est fait chrestien, d'idolatre Payen.  
 Que pleut à Dieu que ces deux nations,  
 Fussent en paix, sans machinations  
 D'effectuer l'entreprinse sanguine  
 Du cruel Mars, qui tous les iours s'engrigne :  
 Si ce n'estoit contre les infideles,  
 En exaltant le renom des fideles.

Or est tousiours en Bourgoigne obseruuee  
 Le Loz à Dieu) ceste loy tant prouuee  
 Où lon te tient (non par chance fatale)  
 Grand Besançon la cité capitale :  
 Craignant vn Dieu, reuerant son Eglise,  
 En quoy les tiens ancestres ne deguise.  
 Puis pour florir plus magnifiquement,  
 Tu te regis tant politiquement,  
 Par Senateurs, administrans iustice  
 Tant prudemment, qu'il faut qu'on ne subdice  
 Parlant de toy, la sentence honoree,  
 C'est que par droit dicte es Cité doree :  
 Cité doree, on te peut appeller,  
 Quand lon te uoit en tout heur preceller.  
 Non du iourd'huy, ains de si tres long temps,  
 Que croniqueurs sont quasi bien contens  
 Plus tost de uray (comme il est uray) le croire :  
 Que recercher par tant antique histoire.  
 Dont iustement par tout lon te renomme  
 Non dissemblable à la fameuse Rome,

Et mesment pour les antiquitez  
Restans en toy par autentiquez.

Dieu cognoissant ta grand' perseuerance  
Bien meritant candide preference,  
T'a conseruè, & conserue en entier,  
Contre tous ceux qui uerroyent uolontier  
Plus tost soudain ton annichillement,  
Que ton renom prosperer tellement :  
Lequel soubs Dieu par sa benigne grace  
Augmentera par heur de race en race,  
Si qu'on dira : Cité d'amenité,  
De citoyens tu es uraye unité.

Et puis que Dieu (mon Seigneur) m'a fait naistre  
En toy : pour toy, me ueux faire cognoistre.  
Non que ie sois, par tant presumptueux  
De m'estimer en sauoir sumptueux,  
Voire à demy, pour rien mettre en lumiere  
Digne de uoir : mais bonté coustumiere  
Excusera vn enfant qui prent cure  
Loüer le lieu bon de sa geniture.

Souz cest' espoir & telle confidence  
Ce mien liuret (sans uaine outrecuidance)  
Dediè t'ay, noble cité d'empire.  
Pour l'aduenir, autre chose conspire.  
Excuse moy, en mon simple exposé,  
Iusques à ce que seray disposé  
Chanter plus haut, en gente poësie.  
Dieu doint l'effect, tel que la fantasie.

A NOBLE ET SCIENTIFI-  
 que persone, Messire Charles du Mo-  
 lin de Paris, docteur ès droitz  
 tres nommé, Ferry Iulyot  
 humble Salut.

**D**Octe docteur, prudent Iurisconsulte,  
 Duquel le nom par tous pays resulte,  
 Non moins de uray, que d'un Balde, ou Bartole,  
 D'un Alexandre, ou d'un sauant Imole :  
 Humble salut de bonne affection  
 Je te presente, en telle intention,  
 Qu'excuseras ce que tu me commis  
 A ton depart, comme ton serf amis.

Tu m'excitas prendre tant d'hardiesse,  
 Qu'abandonner ce mien liuret soubz presse :  
 Ce que i'ay faict, par toy fort enhardy  
 Plus que par ceux qui font si l'azarq dict.  
 Tu le uerras (s'il te plait) quand tu cesse  
 De tes labeurs, pour soulager l'oppresse,  
 Ou bien plus tost, pour un peu diuertir  
 L'aigre regret, dont me fis aduertir  
 Sur le trespas de ta chere espousee,  
 Que dure mort ha de uie deposee  
 Executant en coustumiere force  
 De l'ame & corps d'icelle le diuorce :  
 Diuorçant les liens coniugaux  
 D'entre uous deux iadis par tant egaux,  
 Que des deux uns, & d'un deux tous ensemble,  
 Bien procedoyent les uouloirs ce me semble.

Je ne la uis (comme crois) en face onques,  
 Je l'ay congneu par oyr parler donques.  
 C'est mon parler duquel i'ay entendu,  
 Le sien renom, ia bien loing estendu :  
 Son doulx maintien, & la constance d'elle  
 Tant que sur tous la iugeois plus fidelle.

Les grands regrets, les souspirs & les plains,  
 Qu'à Bezanson en as fait, ie plains :  
 Et maintiendray qu'onques ne ueis mary,  
 Pour le trespas de femme plus marry.

Bien iustement t'en disois concitè,  
 Me recitant qu'en ton aduersité,  
 Elle auoit faict (cherchant ta deliurance)  
 Plus qu'onques fait femme en Bourgogne, ou France.

Or puis que Dieu l'ha distrait de ce monde,  
 Deuant luy soit presenté l'esprit munde,  
 Pour une fois en uie supernelle  
 Le retrouuer apres mort naturelle.

Cecy ie dis sans adulation,  
 Pour te seruir de consolation :  
 Quoy que besoing n'est ia te consoler,  
 Qui de confort peux les autres saouler.  
 Outrepasant depuis le tien depart  
 De Bezanson, quasi de toute part  
 J'ay entendu de sauans mistes braues,  
 Ayans ouy les trois leçons tant graues  
 Que tu nous feis sur la loix, *Qui Romae*,  
 Combien tu es iustement estimè.  
 Si le uolois ici descrire & mettre,  
 Me conuiendroit centuplier mon metre :  
 Mais ton renom est ia tant publié,  
 Qu'à tout iamais ne sera oublié.

Sur ce prens cœur contre les sermonneurs  
Qui de mes ueux seroyent les blasonneurs  
S'ilz ne craignoyent l'honneur que tu m'as faict  
De m'exhorter, lascher mon petit faict :  
Lequel si fort par toy correct & miste,  
Craindre ne doit aucun mordant Momiste.



# SENSVYVENT LES

huit Elegies morales de la belle fille lamentant sa Virginité perdue : dont chascune Elegie ha apres soy un Dizain instructif. Le tout en forme de monologue. Auec plusieurs Epistres, Epigrammes & Traduction en ryme uulgaire, sur les tristes uers de Lactance Firmian sur la mort nostre Seigneur IESVCHRIST, commenceant ainsi

*Quisquis ades medij,q ; subis in limina Templi,  
Siste parum, insontem,q ; tuo pro crimine passum, &c.*



Tout par ledit Ferry Iuliot.



# LA PREMIERE ELEGIE

*Complainte de la Belle Fille,  
en forme de monologue.*

**L**E triste duëil, l'angoisseuse amertume,  
L'aigre regret, d'ennuyeuse coustume,  
Qu'à mon las cœur liurent facheux combas,  
Ont abbatu le but de mes esbas.  
Ie les uois bas par telle destinee,  
Qu'à mon souef ie ne fusse esté nee.  
Soucy pensifz, lamentable tristesse,  
Pour le present, sont mes hoste & hostesse.  
Hostesse suis faisant en moy loger  
Aspre douleur qui n'en ueut desloger.  
Plus ne seray dicte la fille belle :  
Mais par desdaing, la mal'heuree rebelle.  
Yeux gemissans, face ternye & sale  
Ie porteray par chemin, chambre & sale.  
Mes yeux ioyeux, mes facetes chansons  
Seront grands cryz de larmoyables sons.  
Non sans raison : car i'ay chose perdue  
De trop hault pris, que me rend esperdue.  
Chose de quoy ie deuoyz tenir compte,  
Dont deuant Dieu, ie receuray grand'honte.  
Chose ay perdue, plus que toute admirable,  
Veu que pour moy est irrecuperable.  
Qu'ay ie perdu pauvre fille eplouree,  
De tous mocqueurs maintenant exploree,  
Me contraignant tourner dolentement  
La face en bas, & marcher lentement,

Pour ruminer combien ie suis chetive  
Me desirant plus tost morte que uiue ?

Qu'ay ie perdu ? Sont ce uaines richesses ?  
Or, ou argent, ou superflues largesses  
De fols atours, & ornements mondains,  
Que plusieurs font ébestez, fols & dains ?  
Ay ie perdu mes parfumes, fardures ?  
Mes chaines d'or ? mes aneaux ? mes dorures ?  
Helas nenny : car si c'estoit ma perte,  
Tant ne seroit pour huy ma plainte aperte.  
Chose qu'on peult une fois recouurer,  
Qu'ayant perdu, ne doit le cœur naurer.

Las i'ay perdu Pure uirginitè,  
Que ie receu à ma natiuitè,  
Pour seurement estre entiere uoeue,  
Ou pour mon pair, selon la Loy donnee.  
Ie l'ay perdu sans ueux, en ieune eage,  
Outre l'honneur de loyal mariage,  
Par où ie tiens qu'un chascun m'en accuse,  
Sans supporter mon deffaut par excuse.

Que me diront les candides Vestales  
Du temps passè, gardans fleurs uirginales ?  
Que me dira Daphnè uierge naifue,  
De Iupiter, & sa fureur craintiue,  
Iusques à ce, que doubtant la nuee  
De uoluptè, en Laurier fust muee ?

Viens t'en à moy, non pas toy folle Helenne,  
Par qui perit toute la gent Troyenne :  
Mais bien plus tost Lucretse desolee  
Qu'à force fuz par Tarquin uiolee :  
Et si comprends ma desolation,  
Elle sera ta consolation.

Car par effort ta chasteté fidele  
 Rauye fut d'un superbe infidele.  
 Et i'ay perdu par fol consentement,  
 Ma pureté, plainte presentement.  
 De mon uouloir ie me uois effacee  
 D'integrité, mais tu es efforcee.  
 Mondain plaisir d'honnesteté m'efface  
 Honteusement, me prosternant la face :  
 Iuste support, pour l'effort te memore,  
 Et par honneur, continue ta memoire,  
 I'ay deffailly, surprinse & subornee  
 De Volupté, où me suis adonnee :  
 Mais quant à toy, si tu es corrompue  
 Outre ton grè, forcement es uaincue.  
 Il en appert quand de cœur inhumain,  
 Publiquement as prins mort de ta main :  
 En detestant l'iniure & insolence  
 Que t'auoit fait charnelle uiolence.

Je deurois bien (si ne doutois de l'ame)  
 Faire encor pis, rendant mon corps soubz lame,  
 Quand sans effort me sens d'honneur distraicte,  
 Et qu'à bon droit par tout honte me traicte,  
 Iusques au bout de laisser bon espoir,  
 Me suffocquant par craintif desespoir.  
 Saine raison toutesfois m'admonneste,  
 Si ie ne suis de corps pure & honneste,  
 Que l'ame soit non portant asseuree  
 De ne sentir peine desesperee.  
 Desesperee est bien la creature,  
 Que desespoir domine & aduventure,  
 Si en perdant i'ay beaucoup offensé,  
 Dieu pour autant ne m'en ha insensé.

Puis qu'il m'ha donc encore laissè bon sens,  
 Me conforter un petit me consens :  
 En pòurpensant à qui me saurois plaindre,  
 Pour amoindrir mon duëil, & le complaindre.  
 Me plaindre à Dieu, ou de Dieu, ie n'ay cure ;  
 Car il m'ha fait, de rien sa creature,  
 Diuinement mortelle & immortelle :  
 Apte à salut, ou à peine eternelle.  
 Mortelle suis, quant au corps seurement :  
 Mais immortelle en ame assurement.  
 En bien uiuant, i'attens saluation,  
 En offensant, seure damnation.  
 Ce sont les poincts (à dire uerité)  
 Nous assurant qu'en Dieu n'est qu'equité,  
 Toute bonté, & parfaicte iustice,  
 Loz, gloire, honneur, supprimant iniustice.  
 Ains ie prendray par simple coniecture,  
 Occasion, redarguer nature  
 Que m'ha formé un corps tant feminin,  
 Tant bien qu'adroit, uenuste & bening,  
 Tant estimè en composition,  
 Que m'ha causé triste perdition  
 Et si ie n'ay de nature audience  
 Me condamnant par saine sapience,  
 L'exposeray lors ma misere amere,  
 Tout à mon mieux, à mes pere & mere,  
 Qui m'ont lasché l'arrest indulgement  
 A uolupté, me poignant urgement.  
 Car si rigueur & chastoyz moderez  
 Eussent reprins mes ueux immoderez,  
 Me retirant la bride liberale,  
 De mes souefs, las ma fleur uirginale

N'eust resenty uent de corruption :  
Ains ie seroys en ma perfection.

Si mes clameurs comprins & minutez,  
De mes parents se trouuent consutez :  
Ie pense bien auoir l'occasion  
Bien accuser, & sans derision  
Outre cuidez amoureux, qui m'ont prins  
Par leurs subtils & cauteleux comprins,  
En m'enuoyant presens pour ambassade  
Qu'est l'argument, le but, & la passade  
Pour paruenir aux desirez desirs,  
Les commuant en uains secrets plaisirs.

Si ie ne suis par ces poincts excusee,  
Ie demourray pour chetieue rusee :  
Et dira lon que forme corporelle  
Cause grands maux, discord, honte & querelle.

### DIZAIN INSTRVCTIF.

*Soy condoloir, ce n'est que chose humaine,  
Ayant perdu thresor de bonne estime :  
Mais desespoir qu'à damnation meine,  
Prendre ne doit personne que s'estime.  
Clameur humain seulement nous intime  
En ces bas lieux, nostre imperfection :  
Que ne pouuons porter affliction  
Egalement, comme felicitè :  
Si biens prisons, pour la perfection,  
Nous ne deuons blasmer aduersitè.*

## SECVNDE ELEGIE DE LA

*belle fille adressante à Nature.*

**P**iteusement maintenant m'adventure  
 Vous aduertir (bonne dame Nature)  
 Apres salut triste & forment piteux,  
 De mon estat, sur tous calamiteux,  
 Calamité, sœur de perte nociue,  
 Plaine d'ennuy, & tristesse excessiue,  
 M'a stimulè cette Elegie uous tixtre  
 Sans apparat n'y uoluptueux tiltre.  
 Tiltre ne faut de grande uoluptè,  
 Au narratif de ceste uoluntè :  
 Voluntè n'est bien souuent uoluntaire  
 A conuoquer un ioyeux secretaire :  
 Où lon cognoit, auoir groz detrimement  
 Soit en pouuoir, richesse ou nutriment.  
 De m'excuser donques dame uous plaise  
 En mes escripts, si chose est qui desplaise.

De Dieu puissant i'ai receu la semblance  
 Diuinement en ame d'excellence,  
 Que ne prendra iamais diffinement,  
 Soit en salut, ou final damnement.  
 Et uous m'auez par naturels accords,  
 Confabriquè un mortifere corps :  
 Plus adonné, & propense à tout uice  
 Qu'à uray' uertu & son loyal seruice.

De l'ame sens stimules salutaires,  
 Leuans mon cœur en pensees solitaires

Iusques aux cieux, desquels est descendue :  
Pour une fois y retourner rendue.

Mon corps se plaint & demaine tousiours  
Cerchant çà bas ses dangereux seiours,  
Ses uoluptez, ses pompes, ses honneurs,  
Où bien souuent sont cachez deshonneurs,  
De iour en iour mondainement s'amuse  
A rechercher ce qu'à la fin l'abuse.  
Dieu il oublie, & son affection  
Rend & dedie à terrestre action.  
Ses fols plaisirs il prefere à uertus,  
Ne desirant ceux qu'en sont reuestus.  
Plus il est beau, uenuste & bien formé,  
Plus elegant, testonné, parfumé,  
Plus chier tenu, nourry & soustenu,  
Plus enrichy, redoubté, maintenu,  
Plus honoré, plus se monstre superbe,  
Coquard, hayneux, chagrineux, & acerbe.

Il est donq cler, que forme naturelle  
Assouciee d'une ayse temporelle,  
Cause souuent & à l'ame & au corps  
Honte, douleur, ennuy, perte et discords.

Ainsi m'en prent (bonne dame Nature)  
Donné m'auiez corps de gente stature  
Tout bien formé, composé & comprins,  
Que le plus cher de mes ioyaux est prins :  
Loz uirginal, par ma beauté uenuste  
M'ha delaissé en angustie anguste.

Orné m'auiez le chef de blonds cheueux,  
Polis, luyans, longs comme ie les ueux :  
Lesquels m'ont fait monstrer de toutes pars  
La face honnie estans dessus espars.

Vn front quarré, deux yeux estincellans  
 Plus que le cler diamant pululans,  
 Assis & mis sur deux ioües uermeilles,  
 Minces de peau, & aux coings deux aureilles  
 Tant proprement & si bien adiancees  
 Qu'impossible est d'estre mieux compassees.  
 Pour separer ces deux ioües feminines,  
 Vn petit né, à deux ioinctes narines,  
 Auez assis, et dessus une bouche :  
 Qu'heureux se tient qui d'icelle s'abouche,  
 Lors qu'en foubriis & doucettes facundes  
 Ie veux ouurir mes leures rubicundes,  
 Pour sus les dents blanches comme l'yuoire  
 Donner baiser, qu'est d'amour la uictoire.  
 Paracheuant ce uisage tant miste,  
 Forchu menton appert comme limite  
 Mise en beau champ, auquel rien ne faut prendre,  
 Moins adiouster, minuer, ny reprendre,  
 Col rondelet, sans nerfs, ny noires uaynes,  
 Sans grand tumeur, sans rides anciennes  
 Mis & assis, sus espaules croisees,  
 Consonamment faictes & composees.  
 Et puis apres deux rotondes mamelles,  
 Distinction de males à femelles,  
 Embellissans l'estomach de leurs formes,  
 Comme le ciel, deux astres uniformes :  
 Ayans blancheur & dureté mollete  
 Ioyeuse à ueoir, à tenir tendrelette.  
 Moins ne sont beaux les deux bras tant humains,  
 Bien arrondis, & les deux blanches mains,  
 Vuydes dehors, colorez es ioinctures,  
 Et par dedans portans lineatures,



Pour amuser ces muguets artiens,  
Pronostiqueurs ou chiromanciens.

Bref uous auez le reste du corsage,  
Tant bien complet, par naturel ouurage,  
Qu'on iugeroit, ayant tout regardè,  
Que mon corps est fait pour estre gardè.

Mais cognoissez (ô Nature benigne)  
Presentement (cecy pas ne deuine)  
Que tels beaux dons de naturelle grace,  
Font succumber la personne en disgrace  
De pureté & chasteté modeste.  
Ainsi m'en prent, de quoy uous admoneste,  
En me plaignant : car ma beauté lassie  
Ha pourchassé ma ruine nociue.

Pourquoy m'auez donc si belle formee,  
Pour à la fin en estre diffamee ?  
Vous m'auez fait comme sottte nourrice,  
Qu'à son enfant (afin ne le marisse)  
Donne un cousteau, duquel souuent se blesse,  
Comme ignorant de la force ou foiblesse.  
Ma grand beauté & naturelle forme  
Ha concité mon fol desir conforme  
A uanité, par caute illusion,  
Me fabricant secreete abusion.

Pour ma beauté suis estè pourchassee,  
Et sans conseil de uertu dechassee.  
Beauté m'ha mis & leuè en bombance,  
Arrogamment puis par outrecuidance,  
l'ay bien osè tant presumer de moy,  
De la regir : dont me uois en é moy.  
Car elle m'ha uaincue & subiuee,  
Et sans espoir en honte releguee.

Comme i'ay dit, uous la m'avez donné  
 Et puis m'avez de loing abandonné,  
 Sans me laisser conseil, force ou finesse,  
 Pour supporter ma fragille ieunesse.  
 I'ay bien raison doncques que me retire  
 Par deuers uous en mon mal & martyre,  
 Vous accusant de ma fragilité,  
 M'ayant surprins l'esprit d'agilité  
 Qui puis apres de simple affection,  
 A machiné ma desolation.

Consolez moy doncques dame Nature,  
 Qu'avez causé la fatale aduventure,  
 Precipitant mes renom, loz & fame,  
 A tout le moins que n'en demeure infame.

### DIZAIN INSTRVCTIF.

*Ce sont abus de uouloir offenser,  
 Pour recercher sur autruy son excuse.  
 Quiconque faut, doit sa faulte penser :  
 Et proprement luy mesme s'en accuse.  
 La belle fille à Nature s'excuse,  
 La déclairant estre l'occasion  
 De son mesfaict : mais c'est illusion.  
 Nature n'ha rien faict qu'à bon vsage :  
 Dont dire fault, que c'est abusion  
 Pechant de cœur, accuser le uisage.*

### LA TROIZIEME ELEGIE

*de Nature, respondant à la belle fille.*

**D**E cœur bening sans colere rogie,  
 Fille, i'ay prins & leut ton elegie.

L'ayant perleut ie suis memoratiue,  
 Que saigement te confesse chetive  
 D'auoir perdu chose tant sumptueuse  
 Qu'intégrité : mais trop presumptueuse  
 Tu as esté d'en faire emotion  
 Et contre moy par acclamation.  
 Trop simplement cherche t'en deculper :  
 Et sans raison, à grand tort m'en culper :  
 Bien clerement chascun congnoit ta culpe,  
 Besoing n'est donc qu'un autre t'en deculpe.

Il t'est aduis, que par bon argument,  
 Tu m'as escript & reprins aguement,  
 Quand par blasons, de mes dons naturelz  
 Sur tous plaisans, entre biens temporelz,  
 Bien uainement, te dis estre seduicte.  
 Il n'en est rien, c'est ta pauure conduicte.  
 Chose n'ay fait, ny ne fais rien aussi  
 Qu'à bonne fin : lon le doit prendre ainsi.  
 Vouloir blasmer un bon œuure, & bien fait,  
 C'est iugement de cerueau imperfect.  
 De moy n'as rien, pour uerité, receu  
 Qu'aucunement te puisse auoir deceu :  
 Rien n'as de moy mouuant calangement,  
 Sy gouuerné te fusse sagement.  
 Tout tend à fin de louer Dieu puissant,  
 En contemplant son œuure florissant.  
 Tout tend à fin, sans uaine coniecture,  
 De louer Dieu en sa belle facture.

Mais qu'as-tu fait, sotte presumptueuse ?  
 Tu as laisse modestie uertueuse,  
 En presumant de temeraire audace,  
 Que ta beaulté prouenoit de ta race :

Voire de toy, & de ton mouuement :  
 Sans ruminer le tien commencement  
 Qu'est moins que rien, si ne m'y fusse aydee.  
 Or me respond coquarde oultreuidee,  
 Quand tu nasquis, qu'apportas tu au monde,  
 Fors pauureté, & tout horreur immonde :  
 Lesquelz tairay, te laissant les penser.

Ne t'ay ie pas fait apres dispenser,  
 Depuis le iour de la tienne naissance,  
 De rudité, te donnant congnoissance :  
 Accroissement & uegetation,  
 Fortifiant debilitation  
 Qu'estoit en toy : & par labeur subtil  
 Peracheuant ton corps beau & gentil ?  
 Durant le temps de ta pure innocence  
 Ie t'ay gardé à mon mieulx de nocence,  
 Sans te iouer d'aucune trahison.  
 Et puis apres ie t'ay donné raison  
 Que seurement par congnoissance humaine  
 T'ha démontré, la uoye qu'à salut meine.  
 Vice ou uertu, par ces deux nobles dames,  
 As peu choisir pour essouir tous blasmes :  
 Par congnoissance indubitablement.  
 Bien as congneu & mal semblablement.  
 Raison tousiours a taché d'aduancer  
 Choisir le bien, & le mal delaisser.  
 Raison tous temps sans egaree souplesse,  
 T'ha enhorté prendre & fuyuir simplesse,  
 Et t'acoustrer, sans pompe superflue,  
 Modestement quoy que finance afflue.  
 Bien as congneu qu'ainsi te failloit uiure,  
 Pour d'un chascun te ueant, loz consuyure :

Mais de raison tu t'es uoulu retraire,  
 En tous tes faitz poursuyuant le contraire.  
 Ingratement, donc me uiens accuser :  
 Quand pour biensfaitz, tu ueulx maulx excuser.  
 Dea sont ce regratiations  
 Que tu me fais par cachinations ?

Si blondz cheueulx t'ay donné bien duysans,  
 Et deux beaulx yeulx comme estoilles luyans,  
 Bien eusse fait ta teste encheuestree  
 De rudes crins & noirsure feutree.  
 Pareillement aueugle, lusque, ou borgne,  
 En te rendant hydeuse, iaffre, & morgne.  
 Et non portant qu'as deux belles ouyes,  
 Bien eusse fait que parolles ouyes  
 De ton uiuant tu n'en eusse conceu,  
 Ou de tes sens le meilleur fut deceu.

Si le sentir ton né prent à son aise,  
 Bien eusse fait que fusse esté punaise.  
 Haye de tous, où tu es recerchee,  
 N'eusse ie pas bien rendu empeschee  
 De filz nerueux, ta langue tant agile  
 A decliquer la parolle fragile ?  
 Et où tu es de corps cointe & parfaicte,  
 Bien t'eusse fait bossue & contrefaicte,  
 Des bras aussi detors, & mains grifeuses,  
 Que ie t'ay fait doulces, delicieuses.

Alaigrement tu marche, & point ne clouppe  
 Et neanmoins, bien t'eusse rendu clouppe.  
 Brief, rien ie n'ay en ton corps bien formé,  
 Facilement que n'eusse difformé.  
 Aduise donc la grande ingratitude  
 Que gist en toy, couurant ta turpitude,

Ou la tachant musser malignement.  
 Soubz mes biensfaitz, donnez benignement.  
 C'est perdre temps, ie ne t'ay enhorté  
 Sinon à bien, & de mal dehorté.  
 Mais pour le uray dire de ta facture,  
 Tu as uoulu contrefaire nature :  
 D'un fol esprit & uaine fantasie,  
 Pleine d'orgueil & simple frenaisie.  
 Car tu n'as prins de moy contentement,  
 Mais as cerchè en tous lieux tentement  
 Pour reformer (non sans damnable oultraige)  
 Souuentes fois, mon naturel ouuraige.

Ie t'ay aprins tes beaulx cheueux pigner,  
 Honnestement, sans les trop popiner,  
 Et les trousser en atour feminin :  
 Et tu as prins fars pires que uenin,  
 Eaues, parfums, pour les refigurer,  
 Ou bien plustost pour les defigurer.  
 Ce n'est pas tout, prins as les chaux ponsons,  
 Pour les cramper, en estranges faceons,  
 Les espandant sur ton front par houppees,  
 Qui t'ont rendu semblable à chous huppees  
 Quoy que iugeois en estre plus mignarde,  
 S'ils uouletoyent sur ta face troignarde.

Puis qu'as tu fait de ton naturel taint ?  
 Le refardant, souuent tu l'as destaint.  
 Car par unguents & cyuette musquee,  
 Ou d'autres fars, ta face as offusquee :  
 Que n'ha duré : car il est tout notoire,  
 Qu'une beauté par art, est transitoire.  
 Mais la douceur & uermeille taincture  
 Dure long temps, prouenant de nature.

Bien tost appert, & se donne lon garde  
 D'un taint fardé qui les rides regarde.  
 Aussi la peau, tant frottee & buffee  
 Soudainement se desrompt par roffee.  
 Voire qu'est pis, & bien chose uilaine,  
 Vn taint fardé ne peut souffrir halaine.  
 Ains se terny, cela bien ie l'atteste,  
 Dont quelquefois, Dame torne la teste,  
 Quand uis à uis, avec elle lon parle,  
 Ou le souffler la rendroit rouse & pale.

Tes yeux muguets à demy decouuers  
 As destorné, les guignants de trauers,  
 Pour alterer ta uisee pudique,  
 A un regard montrant signe impudique.  
 En quoy as tu ton ouyr empesché  
 Fors seulement à scandaleux preschè ?  
 Et pour tenir ta parolle affaitee,  
 Tu as forché ta langue en effrontee,  
 Afin qu'on dist, par amoureuse notte,  
 Belle sans per, que uous estes mignotte,  
 De mal en pis, par trop outrecuydee,  
 En te marchant, tu as fait l'embridee :  
 Ne retournant le chef que pour attraire  
 Le cœur des gens, & à toy les soustraire.  
 A descouuert, lon t'ha ueu les mammelles,  
 Seductions urayement infernalles.

Faut-il toucher apres aux uestemens ?  
 Veit on iamais tant de muguetemens ?  
 Tant de fatras ? en bombanceuse oultrance ?  
 Qu'aux femmes faut ? & pour la demonstrance  
 Ce n'est assez le chaperon porter,  
 Et de dorure honneste l'estinter :

Mais le bonnet cloué, & la plumette,  
Sus coiffe d'or, faut auoir en poupette.

O quelz abus, ô quelle réuerie :  
Cela ne sert qu'à pure mocquerie,  
Venant apres aux coiffes de uelours :  
De les porter pendans, c'est sus le cours :  
Ainsi le disent dames en uoix secrette,  
Il les conuient redoubler sur la teste :  
En mesprisant l'estat de bourgeoisie,  
Par un orgueil couuert de ialouzie.  
Contrefaisant Thoretz de damoiselles,  
Ne uela pas des gentiles donselles ?

Que diray plus ? maintenant les lingieres  
Ont œuure assez seulement en gorgieres.  
L'une esclarcie à fils traits, pour uiser  
La blanche chair, & d'amour s'aduiser :  
L'autre fera d'ouurage fort espesse,  
Pour offusquer la peau ridee de gresse.  
Et pour garder d'aualler les tetins,  
Cartons busquez faut prendre les matins  
Que bien souuent l'estomach tant oppresse,  
Qu'en cœur failly, la dame tombe en presse.

Après les gants, pour couurir la main tendre,  
Conuient piquer, coupper, broder, ou fendre.  
Que n'est assez : mais il faut la manchette  
Pendant deuant, que pour rien ne s'achette,  
Et pour ne ueoir le uentre que s'auale,  
Ou qu'est enflé, la ronde uerdugale :  
Auec ses bords rouges & expandus,  
Fait à penser mains actes defendus.  
Tu me diras, c'est pour marcher à l'aise.  
Je te respond, qu'en cela tu te taise,



Car en portant ceste tynne effoncee,  
 Plus de peine as que lors qu'encors trousee  
 En tes habits : uoire auoys plus de grace,  
 Plus de douceur, ou feminine audace,  
 Et plus de loz, que par telle ouuerture,  
 Estrangement contrefaire nature.  
 N'est-ce pas bien nature contrefaire,  
 Quand femme ueut en habits l'homme faire ?

Si ie-uolois en tout, le tout toucher  
 Ce qu'as osé par ta gloire attoucher :  
 Il conuiendrait dire avec Virgile,  
 Sans nuict feroit nouveau iour la uigile.  
 Et conuiendrait (pour le tout dire) prendre  
 Encre & papier qu'on ne sauroit comprendre.  
 Là uois-tu bien que tu t'es alteree  
 Pompeusement, & trop demesuree,  
 Me delaissant, que ne t'ay fait defaute ?  
 Recongnis donc que c'est ta propre faute.

Confondu as, en uicieux usage  
 Mes dons, lesquelz si tu fusse esté saige,  
 Eusse guidé par congnoisse instructe,  
 Selon raison moderee & reduicte.  
 Que te rendroit entiere renommee,  
 Où maintenant te congnois diffamee.

Et non pourtant que tu n'es la premiere,  
 Ayant trouué ces abus, ny derniere :  
 Plus il en est, tant pire ie le treuve :  
 La fin sera reformatiue preuue,  
 Vn iour uiendra, de ces abuz patens  
 Dessus plusieurs qui n'en seront contens.

Va donc former ton accusation  
 Contre l'abus de ta uersion :

Car tu n'as prins, ou receu de moy forme  
 T'ayant seduit, ou delaissè de forme.  
 Tu n'as esté, de ma forme contente :  
 Mais desirant suyure ta folle entente,  
 Tu as peiné trop te refigurer,  
 Pour gens tenter, & à toy les tirer :  
 Les attirant s'ilz t'ont deshonnoree,  
 Accuse toy de ta faute aueree.

### DIZAIN INSTRUCTIF.

*C'est temps perdu à l'homme ingrat bien faire,  
 Car le bienfait iournellement oublie :  
 S'il ne l'oublie, il peine le defaire,  
 Par contre poincts, comme iouëur d'oblye.  
 Mais iamais n'est la personne ennoblée  
 Ayant receu bienfait, sans grand merite,  
 Que pour le moins de cœur ne le recite :  
 Magnifiant la liberalité  
 Dont il l'ha prins : autrement il merite,  
 Le detester en grand crudelité.*

### II

### QUATRIESME ELEGIE.

*de la belle fille à ses pere & mere.*

**C**omme l'oyseau qui prend en hault uolee,  
 Sans estre seur de sa proye éuolee,  
 Pour paruenir, ne cesse escharguetter,  
 Et sur le uol de sa proye guetter :  
 En soucy suis & diuers pensement.  
 (Pere treschier mon seul aduancement,  
 Et uous aussi ma tres honoree mere)  
 Comme pourray en ma misere amere,

Vous exposer la mienne intention.  
 La uous sauez de ma perdition  
 Ce qu'il en est : recit ie n'en feray,  
 Pour euitier facherie : mais diray  
 Qu'il ne me fault bureau ny uert polpitre,  
 Pour composer ceste dolente epistre.  
 Ou ie uouldroys auoir diffiniment  
 Premier qu'entrer en un commencement,  
 A mon souef, qu'à la premiere ligne,  
 Suffoqué fut mon cœur de mort maligne.  
 Soudainement, à le dire tout rond  
 Comme Dathan mourut, & Abiron :  
 Lesquelz tout uifz (pource qu'ilz murmurarent)  
 Contre Moyse, en la terre abysmarent.  
 Ou comme fut Egeas seuere homme,  
 De son uiuant un proconsul de Rome :  
 Qui d'un malin esprit fut effondré  
 Apres la mort de monsieur saint André,  
 Ou comme fut (ayant sens abbatus)  
 En un soupper le roy Andebuntus.  
 Il me seroit beaucoup plus supportable,  
 Que d'endurer reproche insupportable.  
 Si ne ueulx ie perdre quoy que ie die,  
 L'ame que Dieu à salut me dedie.  
 Quoy que ie sens au cœur oppression,  
 Telle & si grand, que sans repression  
 Impossible est à moy chetieue uiure.  
 L'en ay escript à Nature à deliure,  
 Tout à mon mieulx, & me suis azardee,  
 Sans craindre en rien d'en estre brocardee,  
 Luy exposer ma miserable uie :  
 Que rend ioyeux ceulx qu'ont sur moy enuie,

Ou bien de uray que sont mes ennemys :  
Mais peu ioyeux en sont mes bons amys.

Les principaulx & premiers ie uous tiens,  
En presumant qu'en doloireux maintiens  
De mon escript ferez triste lecture :  
Parquoy uouldroyz auoir ia sepulture  
Si me fault il uiure iusqu'à mon iour,  
Où i'entendray le mortifere adiour,  
Que ne sera sans le fort desirer,  
Et de ma fin, les acces conspirer.

Pere piteux, & uous ma doulce mere,  
Assez congnois l'ennuy & peine austere,  
Qu'auiez pour moy, quasi iournellement :  
Ayant parler de mon gouuernement :  
A quoy ie n'ay moyen remedier,  
Fors uous prier ne uous attedier :  
Si quelques points trouuez en mes escriptz,  
Indecemment, ou par oustraige escriptz.  
Car ie ne puis tousiours dissimuler  
L'occasion, que me fait desoler.

Depuis le temps qu'au monde prins naissance,  
Durans mes ans, de premiere innocence,  
I'ay ensuyuy mes naturelz instinctz,  
Sans uains soucys, par œuures enfantins,  
Et là i'ay prins Nature pour tutrice,  
Et de mes ans ieunes gubernatrice :  
Iusques à ce, que congnoissance graue  
M'ha descouuert la uanité, la braue,  
Les fols honneurs, & la fortune agile,  
Le bien & mal, de ce monde fragile.

Dame raison m'a fait recommander  
Foyr le mal, & le bien demander.

Mais uous m'auez donné pour simple guide  
 Grand liberté, que m'a laché la bride  
 A mon souef, courant à mon plaisir  
 Pous contenter uoluptueux desir :  
 Vous confiant, que ie seroys prudente  
 En mes foleurs & ma ieunesse ardente.  
 Ia n'est besoing la bride retirer  
 Aux uieulx cheuaulx qui ne ueulent tirer :  
 Mais ceulx qui uont sans arrest d'aduenture,  
 Convient brider & tenir de mesure.  
 Vous me deuiez (pour uray) en mon ieune eage  
 Ainsi brider, car i'estoys trop uolage.  
 Permis m'auez uisiter aucuns lieux  
 Trop scandaleux & trop pernicieux.  
 Souuentes fois m'auez souffry courir,  
 Et çà & là, sans trop vous enquerir  
 Que ie pouuois illec auoir affaire,  
 Vous ne pouuiez pour me perdre pis faire :  
 Car bien souuent, soubz l'ombre de danser  
 Honnestement, lon m'ha induit penser  
 A diuers cas par signes malheureux,  
 Assez communs entre ces amoureux.  
 Ce sont estez premieres embassades  
 De mes malheurs : en apres les aubades  
 Qu'on m'ha donné estant nuyt, uous dormans,  
 M'ont incité approcher les amans  
 Nocturnement, par guichet ou fenestre :  
 Là mains propoz iceulx m'ont fait congnoistre,  
 Pour imprimer en ma simple pensee  
 L'intention, me rendant pourchassee,  
 Et imprimant tel scandaleux pensé,  
 Où n'a este bon chastoy impensé,

Me suis trouuee en ruine mauldicte,  
 De tous honneurs & louange interdite :  
 Donc si ie dis que uous estes la cause,  
 Qu'asseurément mon infortune cause :  
 Ie n'ay pas tort, nenny pour uerité.  
 Si uous reprens, uous l'avez merité.

Nature après fort marrie, m'argue  
 Estroictement, & bien me redargue  
 De mes habitz, & pompeuse uesture,  
 Ce uient de uous, ainsi le coniecture.  
 Car pour certain si m'eussiez accoustree  
 Modestement, ne me fusse monstree  
 Si frequemment par chemin, ny par uoye :  
 Garde n'avez qu'un paun sans queue on uoye  
 Soy pirouër, ou faire roue uolage  
 Lors qu'en muant, se denue de plumage.  
 Les beaulx habitz causent souuent la monstre  
 De deshonneur caché, qu'apres se monstre.  
 Ce n'est le tout, tant les filles parer,  
 Car paremens les font equiparer  
 Prinse d'orgueil, à leurs trop dissemblables  
 Auxquelles font la part comme semblables,  
 En contemnant leur simplete compagne,  
 Que simplement, par uoye les encompagne.  
 Plus les habitz, par trop desordonnez,  
 Attirent gens à uices adonnez :  
 Pour soy ranger pres de telle pimpure,  
 En conspirant contre integrité pure.

Nature n'a depuis gaire musé  
 Taxant les fars, desquelz i'ay abusé :  
 Contrefaisant naturelle couleur,  
 En quoy n'avez corrigé ma foleur.

Combien de fois m'auez ueu empeechee  
 A ces mirouers, & ne m'en suis cachee  
 Aucunement, car uous le permettiez  
 Indulgemment, & ordre n'y mettiez :  
 Voire qu'est pis, uous me disiez proprete  
 Quand me farder & tinter estois preste.

Si mon parler changeoys en mignardise  
 lasant beaucoup, m'en teniez plus exquise,  
 En me louant d'auoir un bon esprit.

O pauvre loz de uanité esprit,  
 O simples gens, qu'estimez une fille  
 De bon esprit, qu'abondamment babille :  
 Beaucoup seroit meilleur & plus louable  
 De soy taïser, en simplesse amyable.

Si ce n'estoit que ie crains faire oultrage  
 A uoz honneurs, ie diroys d'auantage.  
 Mais pour le moins uous ne scaurez nier,  
 Mon proposer, que me fait déuier.

Soustenez donc un petit ma querele :  
 Me supportant, si quelcun m'en querele  
 Trop aigrement, & de moy fait la mocque,  
 Mocquez uous tiens, quand uostre fille on mocque.  
 Excusez la, car uous l'auez nourrie  
 En ses plaisirs, luy causans mocquerie,  
 Prenant à grè, si ie uous ay reprins :  
 Oyseau fleutant, dit ce qu'il ha aprins.

### DIZAIN INSTRUCTIF.

*Estudier doyuent peres & meres  
 Bien chastier leurs enfans, en ieunesse :  
 S'ilz ne le font, ilz les uoyent en miseres,  
 Les accusant, de nuysante simplesse.*

*Laisser nè faut l'enfant nè en souplesse  
 Tailler les faulx agiles qu'il peut faire.  
 Car s'il cognoit liberté uoluntaire,  
 Il se pourra en sautant outrager :  
 Beaucoup mieulx uaut de ses folies le traire,  
 Qu'à son uouloir le souffrir dommager.*

## 12

## CINQUIESME ELEGIE,

*des pere & mere respondans  
 à leur fille.*

**I**L semble bien (ô fille débauchee)  
 A ton escrit, que tu es moult fachee.  
 Et pour certain, à bien peser la lettre,  
 Occasion as plus grande de l'estre :  
 Car l'on cognoist la tienne ingratitude,  
 En la lisant, & ton legier estude.  
 Il t'est aduis (ton escrit le tesmoigne)  
 Qu'auons esté cause de ta uergongne,  
 Pour t'auoir fait en bonté paternelle,  
 Conioinctement à douceur maternelle,  
 Tous les faueurs & cordialitez,  
 Bons traictemens, secours, humanitez,  
 Qu'un pere doulx, & une mere aussi,  
 A leurs enfans doyuent sans cas, ne si.  
 Et nous uoyons, que pour la recompense  
 Ingratement accuser tu nous pense.

Est ce le bien que de nous as receu ?  
 Qu'apres t'auoir engendré & conçu,  
 le t'ay porté, moy ta dolente mere,  
 Neuf moys entiers en peine tres amere ?



Voyre si grand, qu'à dire est impossible.  
 Et n'est à toy aucunement possible.  
 Autant pour nous en faire ou supporter.  
 Auisse donc qui t'ha fait inuenter  
 Les mal comprins propoz, desquelz tu use :  
 En grands erreurs damnablement t'amuse.

Ouse tu bien ingratitude malheureuse  
 Leuer le front, la langue dangereuse,  
 Redarguans par argumens confus  
 Tes geniteurs, qui n'ont fait le refus  
 T'alimenter, conduire, & gouuerner,  
 Entretenir, coucher, leuer, torner  
 Es premiers ans de ton eage enfantin :  
 Fut nuit, fut iour, fut de soir ou matin ?  
 Combien de fois as tu rompu les somnes  
 A nous tous deux, oyans tes crys & sonnes ?  
 Combien de fois auons estez transys  
 Quand te uoyons en tormens excessifs ?  
 Combien de fois marrys, & soucieux  
 Sommes estez, leuant les yeux aux cieux,  
 Pour demander à Dieu soulagement  
 De tes trauaux ? & bien estrangement  
 Tu t'en souuiens, reiettant ton malheur  
 Sur ceux, lesquels n'on receu que douleur,  
 Trauaux, labeurs, soucis, dure fortune,  
 Pour t'aduancer, & getter d'infortune ?  
 Et maintenant pour nous recompenser,  
 Tout ton effort emplie à nous tenser.

Que dira Dieu, maudicte reprouuee,  
 Deuant lequel est ta faute prouuee ?

Si Phraates son pere Orond tua  
 Des Partes roy, plus ne s'euertua

A soy monstrier ingrat, mescognoissant,  
 Que tu as fait, par escripts nous tensant,  
 En estimant faire beau uaiselage.  
 Pompilius, qui par le beau langage  
 De Cicero, des eloquens le pere,  
 Fut défendu d'un mortel impropere,  
 Ingratement Cicero meit à mort,  
 Sans du bienfait auoir aucun remort.  
 Et Darius, par son pere fait roy  
 Indulgement, prins d'un grand desarroy,  
 Malignement conspira le tuer,  
 Son souuenir cerchant destituer,  
 Tarpeya qu'en honneur l'on extolle,  
 Feit par moyen uaincre le Capitole  
 A Tatiüs des Sabins roy puissant,  
 Et le maintint quelque temps florissant,  
 Qui puis apres de ce n'estant record,  
 La trucidier & meurtrir fut d'accord.

Tous ces ingrats, ne sont déraisonnables  
 Plus que tu es, ny beaucoup plus damnables.  
 Ilz sont estez auant la cognoissance  
 Du uray chemin, & lumineuse Essence :  
 Et tu sais bien la loy sincere unique,  
 Te defendant ingratitude inique.

Dieu tout puissant aucun commandement  
 Ne nous ha fait, duquel euidemment  
 Nous receuions recompense fecunde,  
 Fors d'honnorer pere & mere, en ce monde :  
 En quoy faisant (cõtre mort que tous terre).  
 Nous a promis longue uie sur terre.  
 Les autres sont remis soubz esperance,  
 Avec foy, & charitable offrance.

Ces poincts pourront et deuront bien suffire  
 A te matter, & tes propos dessire,  
 Les commuant en uraye mansuetude  
 Enuers iceux, ausquelz te rends si rude :  
 Et sagement ta folie recongnoistre,  
 Te suadant par tant te mescongnoistre,  
 Esguillonner par accusation  
 Ceux qui besoing n'ont d'excusation :  
 Car pour certain quand sur eux tu t'excuse  
 De plus en plus, toy mesme tu t'accuse.

Premierement pour du tout confuter  
 Tes fols obiects, & tes dicts refuter :  
 Si nous t'auons liberale tenue  
 Tu es a nous de tant plus en tenue :  
 Et beaucoup plus que par timidité  
 Si nous t'auions liberté limité,  
 Si nous t'auions tenue ferme et ferree  
 Par grands regrets fusse desesperee,  
 Ou bien (si Dieu ne t'en eust preseruë)  
 Iusques à mort desespoir t'eut greuë,  
 Bien nous t'auons lasché immoderement,  
 Mais tu as prins lasche immoderement,  
 Dissimulant tes pensemens secrets  
 Pour accomplir tes comprins indiscrets :  
 Car bien souuent simulee faintise  
 T'ha enhorté cheminer à l'Eglise :  
 Où nous pensions que feroys oraison  
 Deuotement à Dieu, selon raison,  
 Pour ta ieunesse à uertu esmouuoir,  
 Et t'inspirer en ce faire deuoir :  
 Te retirant de uanité pompeuse :  
 Et tu as fait tout le contre en trompeuse,

Car ton regard as torné par œillades,  
 Escharguettant les faisans pourmenades,  
 Lesquelz as mis en damnables perilz,  
 Par tes attraicts, & dangereux soubbris.  
 De ces soubbris, pensée est pullulee  
 Ayant getté le cœur à la uolee :  
 Pour entamer soubz propoz amoureux  
 Enhortemens à uice fauoureux.

Souffri auons que tu as fait emprise  
 Aulcunes fois, non pour la conuoitise  
 Que nous celoys interieurement,  
 Las quantesfoys exterieurement  
 T'avons monstré par dictz & par exemple  
 Le bien du bien, & le mal du mal ample ?  
 Combien t'auons doucement fait entendre,  
 Que fille à bien tendant, ne doit attendre  
 Peracheuer le seul commencement  
 D'un fol propoz, commencé doucement ?  
 Veu que prester l'aureille beneuole  
 Au commencer de parole friuole,  
 Gaigne le cœur, pour attendre la fin,  
 Là est trompé le cœur, quoy qu'il soit fin :  
 Et signamment de pauvre simple fille,  
 A decevoir plus soudaine, qu'abille.

Si des habitz t'auons donné largesse,  
 Nous esperions de toy telle sagesse,  
 Que d'autant plus humble t'en monsteroye :  
 Et par orgueil ne t'en esleueroye :  
 Voire doubtions, que si n'estoye uestue  
 Honnestement, bien tant seroys testue  
 D'abandonner ton corps pour le parer :  
 Que nous feroit en deuil desesperer.

Quand à tes fars, pauvre fille abusée,  
 Tu les nous as caché comme rusée :  
 Nous affermant estre eue sans fallace,  
 Pour nettoyer macules de ta face.  
 Ainsi nous a ta grand malignité  
 Tous deux deceus, monstrans benignité,  
 Qui n'auons fait chose que naturelle,  
 Te nourrissant tendrement sans querelle.  
 Nature ueult, induit, uoie contrainst  
 Tous animaulx, suyure par uoye & train,  
 Pour soustenir, nourrir, garder, defendre  
 Ce qu'ilz ont mis au monde, sans mesprendre.  
 Mespris n'auons doncques t'ayans nourrie  
 Bien tendrement, & doucement chérie.  
 Nostre dehu auons en toy parfait,  
 Mescongneu l'as de uoloir imperfect :  
 Mesconnoissant combien nous as costé.  
 Torne tes plains doncques d'autre costé,  
 En confessant que de toy uient l'offense,  
 De laquelle as sur nous cherché defense.

### DIZAIN INSTRUCTIF.

*Enfans malings blasmans peres & meres,  
 Sur eux gettant uoz forfaitz cauteleux,  
 Changez uos cœurs & uos facons seueres,  
 Plus contre iceux ne soyez arceleux,  
 Reconnoissez uos espritx cauteleux,  
 Vous excitans contre la loy diuine  
 A mespriser par faict, parole, ou mine,  
 Ceulx que deuez en tous temps uenerer :  
 L'enfant ne peult uiure par long termine,  
 Qui ne prend soing pere & mere honnorer.*

## SIXIEME ELEGIE DE LA

*belle fille aux amoureux l'a-  
yans seduicte.*

**M**Vguetz amans, ausquelx ceste i'enuoye,  
Soubz triste espoir qui la meine & conuoye :  
Ne desdaignez entendre les clameurs,  
Les cris, les plains, les propoz & rumeurs  
De moy qui suis dicte La Belle Fille,  
Pour qui desia desespoir corde file  
Secretement, prest me precipiter,  
Si Dieu puissant tost n'y uient resister.  
Ne desdaignez d'entendre sans discorde,  
La fin suyuant ce mien piteux exorde.  
Estre ne peult l'exorde fort ioyeux,  
D'un narratif trop melancolieux.  
Ne dedaignez ouyr celle en tristesse,  
Qu'avez ouy tant souuent en liesse.  
Chanter ne ueult musicale armonie,  
Mais chans remplis de sa querimonie.  
Cy ne uerrez dictiers de rhetorique,  
Desquelz usoit, ains Christ melancolique.

Cy ne lirez mes aduertissemens,  
De folle amour les diuertissemens  
D'honnesteté causans mon infortune,  
Presentement, que trop mal me fortune.

Cy n'entendrez les demandes d'aubades,  
Voltigemens, dances, faulx, ou gambades,  
Pourmenemens, ou causement prolix  
En uolupté, stimule de malice :

De tous ces poinctz presentement n'ay cure,  
 Veu que le train d'iceulx mon mal procure.  
 Mais uous lirez (possible non sans larmes)  
 Les furieux & assidus alarmes  
 Que ie receoys, de triste aduersité  
 D'auoir perdu fleur de uirginité.  
 Cy uous saurez le mal qu'auéz causé,  
 Par uos fins tours, & vostre doulx causé.  
 Cy cognoistrez que m'auéz laissè blasme  
 Que uous reprent, & comme moy uous blasme.  
 Cy conceurez les subornations  
 Que causeront brief uoz damnations,  
 Si ne changez uostre uie deprauee  
 Asses congneue, & de tous reprouuee.

Vous ne sauriez excuse rencontrer,  
 Pour confuter ce que ueulx demonstrier.  
 Demonstrier ueulx & prouuer tout ensemble  
 Qu'auéz basti l'ennui qu'au cœur i'assemble.

O seducteurs, reuestus de faintise,  
 Dissimulans une affaitee sottise,  
 Depuis le temps que uous donnay acces  
 A deuiser i'ay congneu le succes  
 Entierement de uoz intentions  
 Fondez sur dolz & toutes fictions.  
 Bien uous auez comme presumptueux,  
 Par tant osé en terme sumptueux,  
 De me donner promesse d'apparence,  
 Me suadant prendre quelque esperance  
 D'honesteté en uostre compaignee  
 Et de uertu uous m'auéz esloignee.

Vous commenciez uoz propos tant lassifz  
 (Comme sembloit) sur quelque honneur assis :

Mais les moyens & la fin ne tendoyent  
 Qu'à decevoir, & à ce pretendoyent :  
 Car uos subtilz & paliez langages  
 Me fabriquoyent de uoluptè les gages.

De uoluptè, sont les gages premiers,  
 Tous deshonneurs, & blasmes coustumiers.  
 Finablement, s'elle n'est delaissee,  
 Perdition s'y retrouue enlassée  
 Et de pres suyt tardiue repentance,  
 Que iour & nuict pauvres repentans, tence.  
 Par uoz propos suis esté circonduite  
 Tacitement, moins apres assez duite  
 Pour euitier uos comprins cauteleux.  
 Las quantes fois uoz dictiers fabuleux  
 M'ont fait ueiller à la porte ou fenestre,  
 Bien longuement, pour en moy faire naistre  
 Vn appetit mondain desordonné,  
 Pour obtenir mon corps abandonné.

Oncqu'Vllysses n'eut la facunde telle  
 A decevoir : ny la si grand cautelle  
 Theopompus Lacedemonien,  
 Qui eschappa d'industriex moyen,  
 Vne prison forte, noire & obscure,  
 Ne fut plus fin que uous, quand preniez cure  
 A conciter par escript, ou parolle,  
 Cœur féminin, sans maistre, ou conterole.

Combien de fois à l'insceu de mon pere,  
 (En mesprisant la défense ma mere)  
 A tout azard, soubs nocturne commise,  
 Me suis leuee en ma pure chemise,  
 Oyant sonner reclaims, & haultz siffletz ?  
 Dont quelques fois i'en ay receu souffletz



Bien iustement : car fille sage & ferme  
 Ne doit saillir apres la porte ferme.  
 Si ne pouuiez parler en telle guise,  
 Vous m'attendiez bien souuent à l'Eglise :  
 Où par regars de dissolution  
 Changè m'auiez bonne deuotion :  
 A d'autres fois uoz escripts & messages,  
 M'ont attirè en dangereux passages :  
 Desquelz n'auois, ô chetive deceüe,  
 Moyen trouuè une opportune issue.  
 Consequemment pour uous demonstrier graues  
 Et de grans lieux, auez prins habits braues,  
 De trop grands frais, & comme lon m'ha dit  
 Tant par emprumt, que suppliè credit.  
 A d'autres fois auez gaignè tèsmoins,  
 Qu'à uous louer ne mensongeoyent pas moins  
 En recitant uoz ualeurs, uoz richesses,  
 Et soudenoyent que meritiez duchesses.  
 Bref Narcisus de beauté elegant  
 Ne fut iamais tant que uous arrogant,  
 Quoy qu'un chascun dedaignoit pour sa forme.  
 Et Missenus en superbe conforme,  
 Qui bien ousa par son hault trompeter  
 Les dieux Marins uainement irriter.  
 Oncque Apion grammairien antique,  
 Qui s'estimoit de sauoir autentique,  
 Iusques à ce, que de rendre immortel  
 Celuy qu'auroit ses œuures : ne fut tel  
 Menecrates medecin tant superbe,  
 Qui pour guerir de quelque mal acerbe,  
 Estoit content, si ses maladeux  
 Se confessoient ses serfs, comme des dieux,

Encor ne ueulx Maximinus taïser,  
 Qui se faisoit les pieds & mains baiser,  
 Arrogamment, par de grands senateurs.  
 Et d'autres tant d'orgueil emulateurs,  
 En mains escripts, citez & memorez  
 Ne sont estez plus que uous efferez :  
 A quantes fois uous allez par la uoye  
 Apparemment, afin que l'on uous uoye :  
 Pour puis apres surprendre au dépourueu  
 De bon conseil, celle que uous ha ueu.

Absolument, par telles entrefaites  
 Tous deprauez de pechè, pechè faites :  
 Car par orgueil en si rogue apparence,

. . . . .  
 Et conferant uoz propos oultrageux  
 Les supprimez, quoy qu'ilz soyent courageux.

Ce n'est pas tout, ains pour mieux paruenir  
 Et prouocquer un plus long souuenir :  
 Vous ne craignez ouurir bource abandon,  
 Appauurissant uostre pouuoir, par don.  
 Puis quand c'est fait, & tout avez perdu,  
 Chascun de uous se retire esperdu.  
 Et non contens de l'offence premiere,  
 Vous democquez par faceon coustumiere  
 Mes ieux, mes ris, mes emprinses, mes tours,  
 Mes pourmenes, mes accés, mes atours :  
 Velà que i'ay pour recompense d'hayne  
 Auoir aymè uostre faceon mondaine.  
 Velà comment ieunes filles seront,  
 Qui comme moy, à uous s'amuseront.

O pouures gens, subtils, rusez & mistes  
 Trop effrontez, non moins scorpionistes,

Qu'avez uous fait, ma ruine cerchans ?  
 Ouseriez uous nier qu'estes meschans ?  
 De conspirer, & attemper de fait  
 Pour ruiner l'œuvre de Dieu bien fait ?  
 De Dieu receu i'ay une ame bien faite,  
 Et uous l'avez par uil pechè defaite.  
 De Dieu i'auois un salutaire instinct,  
 Bien seurement de uoluptè distinct,  
 Et uous m'avez, par uostre outrecuidance,  
 Loing éloigné de moy, sa prouidence.  
 Nature auoit monstré le sien sauoir  
 A me former quant au corps, de pouuoir :  
 Avec raison & dame cognoissance,  
 Depuis le iour qu'au monde prins essence :  
 Bien suffisante, à estre uertueuse,  
 Belle sans per, en rien deffectueuse,  
 Et uous avez par sort fallacieux,  
 Tout renuersé en chemin uicieux.  
 De pere & mere auoys eu la doctrine  
 Telle qu'il faut, de celuy qu'endocrine  
 Les siens enfans, pour les rendre à salut :  
 Et uous avez de moy tout dissolut.  
 Si quø ie puis dire sans menterie,  
 Qu'avez brassé la uaine mocquerie  
 Qu'on fait de moy. Aduisez donc comment  
 Vous me donrez confort presentement.  
 Puisque m'avez surprinse à desraison,  
 Vous me deuez conforter par raison.

### DIZAIN INSTRVCTIF.

*Vice à uertu est grandement contraire,  
 Si les prenez chascun en son essence,*

*Mais si peult on, en tirer & distraire  
 Chose en effect, esgale de puissance,  
 Vertu s'accroit par uiue congnoissance,  
 Semblablement lon uoit que uice graue  
 De plus en plus, estant preschè, s'aggraue :  
 Ainsi en prent aux bons & uicieux,  
 Le uicieux congneu plus se deprauue :  
 Le bon se rend de tant plus uertueux.*

## SEPTIESME ELEGIE

*des amans respondans à la belle fille.*

**S**I par beaux dictz, ou picque satyrique,  
 Si par chans doux, ou armonie lyrique,  
 L'esprit humain l'homme peut esmouoir,  
 O belle fille, assez fait as deuoir,  
 Pour commouoir, uoie impatiemment  
 Cœur endurcy, plus que nul diamant.  
 Assez tu as inuehy sans clemence  
 Encontre nous, par aigre uehemence  
 Ton proposer : tes termes phalerez,  
 En rhetorique, asses bien colozes,  
 Mouuent beaucoup, en sentence diserte :  
 Et bien appert que tu parle à la certe.  
 Besoin n'estoit d'un patrocinateur  
 Pour de tes plains estre buccinateur.  
 Suffisamment tu te scays emplier  
 A declamer, & tes maulx deplier.

Mais nonobstant qui semble à ton bien dire  
 Qu'on ne scauroit y trouuer à redire,

Et que tu as bien support merité  
 En recitant (comme dis) uerité :  
 Mesme de nous, nous alleguant auteurs  
 De ton meffait, & les seulz promoteurs :  
 Nous te pouuons neanmoins compulser  
 Par mains obiectz, urgens à repulser  
 Tes argumens, que crois persuasifz  
 Que nous rendrons enfin dissuasifz.  
 Isocrates scauant Athenien,  
 Ne te feroit (s'y te semble) orant'rien :  
 Encore moins le docte Hyperides,  
 Ou le subtil orateur Demades.  
 Mais tout comprins, nous auons la response  
 A tous les pointz, dont fault que le front fronce.  
 Rien tu n'as dict en arrogant proëme  
 Que reietter lon ne puisse à toy mesme.  
 Premièrement tu fais un grand discour  
 De tes plaisirs. Or pour le faire court  
 Si tant de faictz tu as à plaisir prins,  
 Nul sinon toy, en doit estre reprins.  
 Aulcun plaisir du cœur lon en peult traire,  
 En premier lieu, qui ne soit uoluntaire,  
 Et uolontè uient de libre pensee.  
 Voluntè n'est, dont s'elle est efforcee :  
 Par consequent, qui au meffait consent  
 Iniure, ou dol, d'aulture que luy ne sent.  
 Nyer ne peux que tu n'aye assentu  
 A tes plaisirs : parquoy si resentu  
 Tu as apres d'iceulx dommage & perte,  
 Tu en es cause, en consequence aperte.  
 Reprens toy donc, en tes legiers propoz  
 Pour tes forfaitz : & nous laisse à repoz.

Si ces raisons ton simple entendement  
 N'ont contentè, entens abondamment  
 Ce que pour uray dirons par le menu,  
 Où nostre droit sera mieulx soustenu.  
 Tu nous reprens & redargue fort  
 Tendrant quasi à un tacit effort :  
 Et sembleroit (entendant tes regretz  
 Par trop haultains, rigoureux & aigretz)  
 Qu'oultre ton gré, nous t'auons diuerty  
 Du bon chemin, & à mal conuerty.  
 Mais qui t'ha meu tant de foyz te parer  
 Popinement ? & de t'equiparer  
 Soit en parler, habitz, marcher, ou mine,  
 A celle qui par dessus toy domine :  
 Si de beaulté tu as esté doüee,  
 Il t'est advis qu'en doibs estre louee,  
 Ainsi comme si tu l'auoys acquise,  
 Ou par ualeur & ta uertu conquise,  
 Sans pourpenser, que telz dons naturelz  
 Ne sont acquis de pouuoirs temporelz,  
 Dieu les enuoye & benigne Nature,  
 Se demonstrans puissans en leur facture,  
 Et de ses dons folle dispensatrice,  
 As mal usè, t'en disant la tutrice:

A quoy as tu appliqué tes regardz,  
 Si non pour nous mouuoir de prendre esgardz  
 Aux insconstans signes de ta pensee,  
 De bon uouloir & prudence lailsee,  
 Nous incitant conspirer sans uergongne,  
 Ce que ton œuil nous annonce & tesmoingne ?  
 Par tes regardz hardis, desordonnez,  
 A t'approcher nous fusmes adonnez :

Et puis soudain estans pres toy assis,  
 Sans aduiser si nous estions rassis,  
 Ou euolez, saiges, ou imprudens,  
 Bons, ou mauuais, refroidis, ou ardens :  
 Plusieurs propoz fut de bon ou uolee  
 Nous as tenu, comme sotte euolee,  
 Et presumoys de iugement intime  
 Que nous faisons de ton causer extime.  
 Il est bien uray, en la tienne presence,  
 Mais tots apres t'en mocquions en absence,  
 Fille ne peult estre fort reputea,  
 S'y de iaser se demonstre usitee.

Plus seurement se treuve en l'inuentaie  
 De bon renom, quand elle se scait taie,  
 Si nous t'auons donné dances, sornettes,  
 Aubades, tours, chansons, & chansonnettes,  
 Dons, & presens, de coustange & gros pris,  
 En deuons nous pourtant estre repris?  
 Tu as esté par ton abusio  
 De nos meschièfz la seule occasion :  
 Car pour t'auoir de nos pouuoirs biensfaictz,  
 Nous resentons comme quazi defaictz.

Oultre passant nous pensans recreer,  
 Si prins auons habitz pour t'agreer :  
 Nous maintenant muguetz, propres, & mistes :  
 Fault il pourtant nous dire chatemites,  
 Simulateurs, deceuans, abuseurs,  
 Ou seducteurs trop en noz abus seurs ?  
 Tout auons fait seulement pour te plaire,  
 Blasmer ne fault ceulx, qui tachent complaire.  
 Si nous auons demeuré iour & nuyt  
 En t'escoutant, plus en auons d'ennuy

Que de soulas, car tepide froidure  
 Nous en à fait grinsers dens sur la dure.  
 Et si tu as pere & mere trahy,  
 Ou les ayant par ce desobey :  
 Il appert bien, que nous n'y auons culpe,  
 Parquoy conuient que toy mesme t'enculpe.

Tu nous as fait comme fait l'oyseleur :  
 Ou bien comment le brigandin uoleur,  
 Qui tous deux font reclaims, & doulces suytes  
 Pour paruenir enfin à leurs poursuytes,  
 Entrefuyant bien doucement leur proye  
 Pour l'amuser, & qu'à eulx on se croye :  
 L'un prent l'oyseau affin s'en recreer,  
 L'autre poursuit l'homme pour le tuer :  
 Ainsi as fait, tu n'as esté rebource,  
 Pour esmouuoir la doulceur de la bource :  
 Et puis apres quand tout est dependu,  
 De nous tiens conte, autant que d'un pendu.  
 Et qu'est le pis, par grand seuerité,  
 De cœur selon, non sans temerité,  
 Tu prens plaisir à remettre la charge  
 Sur nous qu'auons en tout bonne descharge.  
 Descharge toy donc si tu es chargee,  
 Du fait duquel cerche la dechargee,  
 Besoing n'auons, nous rendre dechargez  
 De ton deffault, duquel nous as chargez.  
 Finablement tant plus nous chargeras :  
 Et de tant moins tu te dechargeras.

### DIZAIN INSTRVCTIF.

*Iamais ne fut dict sans bonne raison,  
 Celer son faict est meilleur que le dire :*



*Car qui le faict scauoir par deraison,  
De plus en plus lon y treuve à redire :  
Aussi ne fault de personne mesdire  
Pour soy purger, ou iacter uainement,  
Où il ensuyt quasi soudainement,  
Le reuancher de celuy que l'on blasme :  
Se deffendant du tout tant sainement,  
Que le blasmant n'en remporte que blasme.*

## HVICTIESME, ET DERRIERE

*Elegie de la belle fille, en forme de Monologue :  
reduisant le sens des precedentes  
par Epilogue.*

**L**E cœur dolent d'une personne triste,  
Lerchant confort, qui se plaint & contriste,  
Est beaucoup plus iustement contristé,  
Quand pour son duëil, aucun ne uoid tristé.  
Plaindre le mal de personne qu'endure  
Soulage fort la peine que luy dure.  
Mais le torment est malement durant,  
Quand aucun n'ha pitié de l'endurant.  
Dire ie puis cecy bien esprouuee,  
Veu que de tous ie me uois reprouuee.  
L'ay sur plusieurs mis exprobration,  
Que m'ha torné à reprobation.  
Ceulx que pensoye auoir pour reconfort,  
M'ont debouté subiette à deconfort.  
De ceux lesquelz mé pensois confortee,  
Retourneray du tout deconfortee,

J'ay fait deuoir, bien au long m'encercher  
 Comment, de qui, pourrois ayde approcher,  
 Pour obtenir excuse purgatoire,  
 Du moins support en cause peremptoire :  
 Et i'ay trouuè toute accusation  
 Encontre moy par refutation,  
 Où ie congnois sans doubter, que l'offence  
 Ne sert iamais aux pechans de defence.  
 Asseurément le propre de pechè  
 N'est que de rendre un pecheur empeschè.  
 Et par ce point chacun peut cy comprendre,  
 Loz de uertu, & blasme de mesprendre.

Advis m'estoit, & me tenois fort seure,  
 En simple espoir, que folz mondains assure,  
 Ie trouuerois en nature bien briefs :  
 Soulagement de mes doloireux griefs :  
 Pour d'elle auoir receu les eguillons,  
 M'ayant contraint suyure les torbillons  
 De uoluptè ; mais sans prendre aduocas,  
 Bien promptement elle ha comprins mon cas.  
 Tout puis apres ha mes propoz confus,  
 Discretement faisant de moy refus.  
 Car souhaitant beauté demesuree  
 Certainement me suis deuanturee.  
 J'ay puis apres ousè rendre impropere  
 Trop simplement uoire à mon propre pere,  
 Ma mere aussi i'ai declarè coupable,

. . . . .  
 Le bien à mal, le mal à bien tornant,  
 Et uerité soubs mensonge tenant.  
 Quoy qu'un menteur à tous propoz mensonge,  
 Verité uoid tous temps uaincre mensonge.

l'ay oublié par ingrate memoire,  
 Ce que uertu fait reluyre & memoire.  
 C'est pour le moins de bon esprit apprendre  
 Soy souuenir d'un bien qu'on ne peut rendre.  
 Nous ne saurions pour pere & mere faire  
 Ce que pour nous ilz ont uoulu parfaire.  
 Ce n'est donc pas rendu le reciproque  
 Quand un enfant à courroux les prouoque,  
 Les contemnant, ou prenant de rigueur,  
 Veu que pour luy ont uestu en langueur.  
 De tous ces pointz, qu'à present ie racompte  
 Bien à noter ie n'ay pas fait grand compte.  
 Que me fera reproche & uergongne ample :  
 Mais pour le moins ie seruiray d'exemple.  
 Exemple doit prendre un chacun à moy,  
 Que iustement me retreuve en esmoy.

Les amoureux subsecutiuelement  
 l'ay reproché assez subtilement :  
 En les taxant & reprenant si fort,  
 Qu'aduis m'estoit d'auoir gaigné le fort.  
 Mais tout n'est rien, ilz m'ont bien respondu,  
 Et mon parler puissamment confondu :  
 Redarguant par uehemençe uiue.  
 M'ont mis auant sans flatterie subtiue.  
 Et tant s'en faut qu'ilz m'ayent excusé,  
 Car un chascun d'iceux m'ha accusé,  
 Tout patemment, maintenans pour certain  
 Que pauureté les ha par moy attain :  
 Ayant fonsé en habits & uesture,  
 De grands deniers, non sans griefue iacture,  
 Tendans à fin seulement de complaire  
 A mes desirs, que me doit bien desplaire,

Puis que congnois les miens mondains plaisirs  
 Tous eschangez, en duëil & desplaisirs,  
 M'ayans rendue iustement desplaisante  
 Enuers tous ceux ausquelz i'estois plaisante,  
 Triste est celuy qui peine afin qu'il plaise,  
 Quand rien ne peut faire que ne desplaise.

Velà comment ie me uois repoulsee  
 De tous confors, en tristesse poulsee.  
 Velà comment presumptuosité  
 Conduit les siens, par curiosité.  
 Velà les pointz, articles & parcelles,  
 Que bien noter doyuent tous ceux & celles,  
 Qu'arrogamment par trop s'estimeront  
 Et folement auoir presumeront.  
 Les dons de foy, que Dieu leur ha donné :  
 Car promptement qu'ilz l'ont abandonné,  
 Ne referant à luy ses dons & graces,  
 Soudainement tumberont en disgraces :  
 Voire en danger de perdre entierement  
 Ce que de Dieu ilz ont premierement.  
 A Dieu conuient tous ses biens referer,  
 Quand par bonté les nous ueult conferer :  
 Luy remettant d'iceux le seul regime,  
 Sans presumer nostre puissance infime,  
 Iusques à ce que nous croyons sauoir  
 Bien gouuerner, sans auoir le pouuoir.  
 Ce qu'est de Dieu, à Dieu rendre conuient :  
 Vertu de Dieu, & de nous, uice uient.

Ainsi n'ay fait, dont pour auancement  
 l'ay aperceu groz desauancement.  
 Iugee me suis comme fort temeraire  
 De ma beauté dame propriétaire :

Voire qu'est plus, que de moy l'avoye quise,  
 Et proprement par mes moyens conquise :  
 Me pourueuant bien auoir la puissance,  
 La defender contre toute nuisance,  
 Sans inuoquer mon Dieu pour la ranger,  
 Et contre assaux ueneriques uenger.

Mais i'en ay fait comme ces fantastiques  
 Qui leurs sauoirs pensent tant autentiques,  
 Qu'ilz cuydent bien sans Dieu pour auteur prendre,  
 Tous ses secrets, du bas en haut comprendre,  
 Et bien souuent telle audace prenans,  
 Tombent confus, comme fols apprenans.  
 Ce n'est le tout de faire grande emprinse  
 Mais c'est beaucoup, quand elle est bien comprinse.  
 La fin sera bonne de tous comprins,  
 Que selon Dieu se trouueront comprins.

Ie ne fay plus chose pour me saoler  
 Fors que i'ay tort par tant me desoler :  
 Puisqu'en moy i'ay la consolation  
 De mon grief duëil, & desolation.

C'est que de Dieu ie me suis esloingnee,  
 Dieu m'a aussi non sans cause loingnee.  
 Il me conuient d'autant le raprocher,  
 En supportant le mondain reprocher :  
 Car si i'ay Dieu pour mon consolateur,  
 Crainte n'auray de mondain zelateur  
 Prenant plaisir plus souuent de medire  
 Qu'humainement supporter & bien dire.  
 Asses sera d'auoir en mes deuïs  
 Changé mes mœurs, & reprins bon aduis,  
 De rendre à Dieu, ce que de Dieu procede.  
 Luy qui sur tous, & auant tous procede.

## DIZAIN INSTRUCTIF.

*Qui le bateau entreprend gouverner,  
 Sans aduiser les uens & d'eau le fond :  
 Lon uoid souuent undes celluy mener,  
 Le submergeant en vn gouffre profond.  
 Orgueil ainsi la personne confond  
 Voulant regir chose mondainement,  
 Que Dieu puissant donne diuinement :  
 Puis donc qu'il peult tout perdre & secourir,  
 Il nous conulent uiuant humainement,  
 Viure soubz luy, gouverner & mourir.*

FIN DES. 8. ELEGIES, LE LOZ  
 A DIEU.



# INSTRVCTION AVX IEVNES PV- celles : par frere Matthieu de Masso Lyon- nois, commandeur de Saint Iean de Ierusalem, à Bezanson, &c.

**S**I de Cupido le brandon,  
**S**A le servir uoz cœurs enflame :  
 Subitement pensez à l'ame,  
 Devant que uous mettre à bandon.  
 Le corps & l'ame c'est grand don,  
 On ne peult l'un sans l'autre ouffrir.  
 Pour garder les deux de souffrir,  
 Fuyez l'occasion du uice,  
 Et consentez plustost mourir  
 Que de uenir à malefice.

## LE MESME AVX SVSDICTES.

**O**Ysiueté de uolupté nourrice,  
 Cause à la chair & l'esprit mains discordz,  
 Quand trop long temps elle est dominatrice,  
 A son plaisir, de ce fragile corps.  
 De uoz maisons chassez la toutes hors,  
 Son naturel est de complaire au monde.  
 Le monde en tout à l'ennemy se fonde,  
 Voyez comment elle oste à Dieu ses droitz :  
 Afin que mieulx la pauvre ame confonde,  
 Elle la fait guerroyer par ces trois.

## SEPTAIN SVR LA DEVISE

*de Ferry Iulyot, tout à loisir.*

**T**Out à loisir, c'est ma devise,  
Pour tout à loisir temps passer.  
Qui tout à loisir tout diuise  
Il en peult mieulx tout compasser.  
Tout à loisir outrepasser  
L'on peult bien de tout déplaisir,  
Bien prent faire tout à loisir.







CY EST LA TRADV-  
ction du triste uers Latin, composé  
par Lactance Firmian, sur la  
mort nostre seigneur  
IESVCHRIST.



Par ledict Ferry Iulyot.



TRADVCTION DU TRISTE  
uers latin composé par Lactance Firmian  
introduisant nostre seigneur IESVCHRIST  
parlant en croix, commenceant  
*Quisquis ades, &c.*

**Q** Vi que tu soys, marchant parmi ce temple,  
Arreste un peu, & l'innocent contemple,  
Ayant souffert mortelle passion  
Pour ton pechè et ta compassion.  
Je suis celluy qu'ayant pitié des hommes,  
Suis uenu cy, pour leurs faultes & sommes.  
Aduise moy, & me cache en ton cœur,  
M'y conseruant d'estomach sans rancœur.  
Mediateur suys de la paix promise,  
Et pardonneur de l'offense commise :  
Du hault en bas restituant lumiere,  
Et de salut seule image premiere.  
Icy ie suis ton repoz et ta uoye,  
Redemption qu'à salut te conuoye,  
L'enseigne aussi de Dieu puissant insigne,  
Qui de ta mort l'extremité designe.

Pour toy, ta uie & ton fait criminal  
Je suis entré au uentre uirginal :  
Et puis apres homme formé passible,  
J'ay enduré mort d'horreur indicible :  
N'ayant trouué sur terre oncque repoz,  
Mais tous labeurs & oultrageux propoz.

Premierement au pays de Iudee  
Ma mere print logis triste abordee,

Où ie nasquis entre deux bestes brutes,  
 Dessus le foin en creches fort angustes :  
 Là ie ne tins long temps mon pauvre giste,  
 Mes premiers ans ie uesquis en Egypte  
 Pour euitier d'Herode les malices.  
 Depuis reuins en Iudee, où delices  
 Ie n'ensuyuis, mais ieusnes, pauureté,  
 Toute angustie, et dure souffreté,  
 En excitant humains entendemens  
 Par mes sermons & admonestemens.  
 I'ay adiousté à ma sainte doctrine  
 Miracles beaux, par puissancé diuine.  
 Dont puis apres Ierusalem de rage  
 Prinse & commue, ennuyeuse en courage,  
 Contre de moy par sa furie soudaine,  
 Me fait en croix innocent mourir d'hayne.

Et si failloit les labeurs discourir  
 Que i'ay souffert, auant que de mourir,  
 Pense en ton cœur, donne aureilles attentes,  
 Et si comprends les conseilz, les attantes,  
 Les trahysons contre moy demenees,  
 Vendition de mon sang, les mencees  
 D'un de mes gens, son simulè baiser,  
 Aussi ne faut les battures taïser,  
 Et les insultz des turbes Iudaiques,  
 M'iniurians de langues trop iniques,  
 Les faux tesmoins, l'iniuste iugement  
 Que fait Pilate, imbut estrangement.  
 Pense à la croix qu'on posa sur mon doz,  
 Me supprimant iusqu'à froissement d'os,  
 Les grandz langueurs & les rudes passees  
 Iusqu'à la mort par moy souffrant passees.

Estant ainsi à ces trauaux donnè,  
 Ie fus de tous peinant abandonnè.  
 Haut éleuè, loing de ma chere mere,  
 Contemple moy en peine tres amere.  
 Depuis les piedz iusqu'au chef si tu ueux,  
 Et tu uerras iadis mes blonds cheueux  
 De sang cordez, le col pliè & lent,  
 Estant dessoubs, rouge & sanguinolent,  
 Mon chef percé d'aspre & poignante espine,  
 Rendant le sang sur ma bouche diuine,  
 Mes yeux cernez, où lumiere n'abunde  
 Iouës blessees, & langue sitibonde,  
 Que d'amer fiel l'on sert pour son breuaige.  
 Vois mon piteux et mon pâle uisage :  
 Mes piedz & mains de groz clouz perforez,  
 Et tous mes nerfs tendus, forcez, tirez,  
 La grande playe au costè que ie porte,  
 Et les tormens que tout mon corps supporte.  
 Plie les genoux, pense donc à la croix  
 En larmoyant, confessant qu'en moy crois.

Viens moy cercher par deuot cœur intime  
 Pour me garder, & mes preceptz d'extime :  
 En ensuyuant de ma uie les uestiges  
 Rumine en toy de ma mort les prestiges,  
 Et les langueurs souffers de gent peruerse,  
 T'accoustumant endurer chose aduerse.  
 Sois uigilant à ton propre salut.  
 Si memorant ces pointz n'es dissolut,  
 Et tu ressens mes peines par pitié,  
 En cœur deuot concite d'amitiè,  
 Ce te fera de uertu l'éguillon,  
 Tes ennemys chassant à reculon,

Et marcheras uictorieusement  
 Portant la palme en guerre heureusement.  
 Ces monumens par cogitation  
 Te garderont de prendre affection  
 En ces amys mondains par trop fragiles,  
 Encore moins es richesses mobiles,  
 Où ne seras deceu de ton uiuant,  
 Mais d'un amour autre lieu poursuyuant  
 En bonnes mœurs, pour la uie bienheureuse,  
 Prenant espoir en la peine onereuse,  
 Repeu seras d'une douceur celeste,  
 Contre rigueur mondaine & sa moleste.  
 Puis apres mort, ton ame par ma grace  
 l'appelleray, pour aux cieux auoir place.  
 Là tu feras uoyans saintes et anges  
 En lieu de paix, sans quelques maulx estranges.  
 Où demourras heureux totalement  
 Auecques moy perpetuellement.





## ELEGIE DEPRECATIVE

à Dieu le tout puissant, par ledit Iulyot, en  
faueur des Magnifiques & redoubtez  
seigneurs, messieurs les gouuer-  
neurs de Bezanson, ayant ins-  
tituè la confrairie à l'hon-  
neur du Saint  
Suaire, que  
fut en  
l'an

M. D. XLIII.

**P**Ere eternal, Roy des roys triumphans,  
Entens les plains des chrestiens tes enfans  
Qui de cà bas, lieu de calamité,  
Crient aux cieux, à ta sublimité :



Soy lamentans en piteuse chanson.  
 Et mesmement ton peuple Bezanson,  
 Pour le iourdhuy de ta iustice attaint,  
 Plus amattè que le feu d'eau estaint,  
 Recourt à toy, pour unique refuge :  
 Prends en pitie, en rigueur ne le iuge.

Mortalite le uexe de tel' sorte,  
 Qui n'est espoir qu'en constance l'assorte  
 De fermetè, si ta main rigoreuse  
 T'u ne retiens, de bontè amoureuse.

Retiens ta main, par ta misericorde,  
 Pere piteux, las que tu te recorde,  
 Que ton cher fils ha souffert passion,  
 Dont tu n'es dit plus le Dieu d'ultion,  
 Ains de douceur, exhortant recourir,  
 Les affligez à toy pour secourir :  
 Promis nous as que quand affliction  
 Nous surprendroit, de bonne affection  
 Crians à toi, tu nous exaulceroyes,  
 Et noz langueurs de bref abaisseroyes.  
 Helas congnois l'angoisseuse amertume  
 Dont sommes plains : bon Dieu, c'est la coustume  
 D'un pere doulx ses enfans corriger  
 Benignement, non trop les affliger.  
 Un pere doulx, comme tu es tousiours  
 A ses enfans donne secours tous iours.

Mortalité nous uexe repentine,  
 Guerre n'est loing, & si regne famine.  
 Pouuoir n'auons soustenir telz alarmes :  
 Rien n'y s'auons, fors de respandre larmes.

Vois ta cité Bezanson desolee,  
 Que ne se peut esperer consolee.

Si non qu'elle ha bonne foy, ferme & stable  
 Que luy seras de grace secourable :  
 Nous consolant en nostre urgent affaire  
 En reuerant le digne saint suaire.

Presentement pour guidon le prenons,  
 Dessoubs lequel seurement nous tenons  
 A l'aduenir, par ta grande bontè  
 Bien deffendu contre la cruauté  
 De mort soudaine : & à toy nostre sire  
 Deuant celuy, ceste cité de cire  
 Comme uassaux offrons pour nostre hommage.  
 Te suppliant nous garder de dommage.

De ceste mort romps le dard uenimeux  
 Qui frappe fors, foibles & animeux,  
 Donne des biens aux pauvres indigens :  
 Et nous deffens de belliqueuses gens.  
 Frappe noz cœurs d'un uouloir de bien faire  
 Tant qu'un chascun en paix puisse parfaire  
 De ses pechez saine confession,  
 Par penitence auoir remission :  
 Et ton amour en cest estat de grace  
 Puisse acquerir, pour contempler ta face :  
 Aprez le iour d'extreme adiournement,  
 Nous annunceant mortel diffiniment :  
 La speculant en sainte Trinitè,  
 Comme uoyons la digne humanité,  
 De ton cher filz en linge figuree,  
 Afin sa mort nous soit rememoree :  
 Nous excitant tous temps auoir memoire  
 De ceste mort, que nostre uie meindre.

Amen.

## A ANTOINE LVDIN

escuyer, citoyen de Bezanson, son bon  
 amy Ferry Iulyot  
 Salut.

**A** My Ludin, des fidelz le sincere,  
 Le plus certain & meilleur, ie l'assere :  
 Depuis long temps ie pense, & bien rumine  
 Ce que tousiours de faire tu m'anime,  
 C'est de lacher d'asses hardy courage,  
 Quelque fragment de mon petit ourage.  
 Mais i'ay doubté, & encore ie doute  
 Modestement, des remordants la route,  
 Lesquelz souuent ne regardent l'effect  
 Auquel pretend celluy qui est affect  
 De stimuler les lisans passer temps :  
 Si pour le plus il ne les rend contens.  
 De contenter chascun pas ne presume,  
 En mon cerueau seulement ie resume  
 Trouuer moyens à me rendre seruant  
 Enuers chascun, doulx & courtois seruant.  
 Et si ne puis à chascun bien seruir  
 Iusques ad ce, que de loz deseruir :  
 Il me suffit, qu'on ayt contentement  
 De ce que fais pour simple attentement.  
 Si ie sauroys eliminer ma Muse  
 Pour exprimer ce que de long temps muse.  
 Ce que m'ha fait par si long temps musant,  
 Craintiuement en doute m'amusant,

Ce n'a esté, fors que la musardie,  
 Des reprenans : mais quoy que musard die,  
 Tout à loisir, soubz l'ombre de Faueur,  
 De bon espoir, bien goustant la faueur,  
 Je suis content donner la uoyle aux uens  
 Pour nauiger : du moins, à tous euens,  
 Je puisse encrer, en la mer de Fortune  
 Mon petit fait : esperant que Neptune  
 A son endroit, par undes fluctuantes  
 De fols parler ou de langues bruyantes,  
 Le mien deuoir, tant, petit qu'il sera,  
 A bon support, pour port adressera :  
 Si qu'on dira, ce nouueau nauigant  
 Est hazardeux, mais il n'est arrogant.

Semblablement i'ay uoulu ruminer  
 Ce qu'il t'a pleu souuent determiner  
 Sur le tien fait & ioyeux exercice  
 De bon esprit, par uertus, loing de uice.  
 Tu as doubté, encore fais doubtance,  
 Si tu seras accusé d'inconstance,  
 Pour t'azarder, quasi iournellement  
 A diuers faictz ingenieusement :  
 Car non portant que tu ne donne alarmes,  
 Tu fais forger & confabriquer armes,  
 Non seulement en lames, ou escailles,  
 Mais brauement tu fais estamper mailles.  
 Tu scays auSSI par ta dexterité  
 De tous bastons, le fort, l'austerité.  
 Ce n'est pas tout, ains de bonne industrie  
 Lignes & pointz tiens en geometrie :  
 En pouriectant fondemens, plattes formes,  
 Et bastimens de fort louables formes :

De bien en mieulx pour exciter t'aymer,  
 Puis quelque temps entreprends d'imprimer,  
 Dieu te le doint, pour peracheuement  
 De tes comprins, plus tost que briefuement.

Quel est celluy pour sur ce te respondre,  
 Qui te uouldroit en telz uertus confondre ?  
 Quel est celuy, par tant presumptueux,  
 Te reputant aultre qu'industrieux,  
 De tant de faictz entreprendre à ton chief,  
 Les acheuant par honneur, sans meschief,  
 Et sans escriptz, compte ny formulaire,  
 Pour de telz faictz d'aucun avoir salaire ?  
 Où l'on congnoit genuine noblesse  
 De tes maieurs, qu'en toy ne prent foiblesse :  
 Mais doublement croist de cœur beneuole,  
 Sans t'affecter à richesse friuole,

Que ueulx tu plus au monde conspirer  
 Fors tel renom que ne peult empirer ?  
 Vault il pas mieulx estre laborieux  
 Et à telz faictz honnestes curieux,  
 Qu'aneantir à paresseux repoz,  
 Rendant l'esprit tepide & indispoz ?  
 Finablement pour ta doubte resouldre,  
 A brief parler toi-mesme la peux souldre :  
 C'est qu'en tes faictz bien merite louange :  
 Quand celluy n'est qui les taxe ou calange.

EPISTRE A HONNESTE FEM-  
me, Dame Anne Turgis, femme de  
noble homme Berthin de  
Valimberg, maistre  
des monnoyes  
à Bezanson.

SAnté, cent ans (ma dame ma commere)  
Dieu, pour salut, uous ottroye & sa mere.  
Autant en dis, sans le salut partir,  
D'un bien bon cœur à uostre aymè party :  
Sans oblier la petite mesgnee.  
Où lon uous uoid bien mere tesmoingnee,  
L'omnipotent uous doint la uoir florir  
En tout bon heur, auant que de mourir,  
Tant & si loing, que depuis le deuxieme  
Nombrer puïssies d'hors en hors le neuvieme,  
A ce iourdhuy i'ay prins plume en la main,  
Vous merciant tous deux de cœur humain,  
Tant de plaisirs, & cordialz secours,  
Que m'auez fait, es fortunez decours  
Par cy deuant de ma necessité.  
Le souuenir pour huy, m'a incité  
Quand ie ne puis aultrement recongnoistre,  
Vostre renom faire en mes vers congnoistre,  
Qu'asses congneu par uoz graces benignes.  
Demeurera, en tout temps pour insignes,

Lequel ie dis, & trouve tant exquis,  
 Que pour mary auez eu un Marquis,  
 Marquis ie dis de surnom, & confesse  
 Que bien ualoit un Marquis par adresse :  
 Mais dure mort en son eage amyable  
 Le uous ousta, Dieu luy soit piteable.  
 Depuis gardant entiere renommee  
 Auez vescu ieune uefue extimee,  
 Iusques ad ce, que par tout fault qu'on oye  
 Qu'auuez gaignè un maistre de monnoye,  
 Vostre party, uostre mary second,  
 Graue, loyal, uertueux & facond,  
 Par qui auez de tresor manience.  
 Que uoudriez uous pour meilleure aliance ?  
 Reformider n'à uallee, plain, ny mont,  
 Natif de Quiers, bonne uille en Piedmont,  
 Vous est uenu cercher pour sa partie  
 A Bezanson, où la monnoye bastie  
 De nostre temps, fut copieusement  
 Par nouueauté, soubz luy premierement,  
 L'an qu'on disoit mil cinq cens trente sept :  
 En rien ne mens, un chascun sait que c'est.  
 \*Quant au premier (comme desia i'ay dit)  
 Bien il ualoit un Marquis en credit.  
 De ce Marquis auez une Marquise  
 Premier enfant de uous, nommee Louyse :  
 De telz uertus, qu'en porte tesmoignage  
 Le sien espoux, tant graue personnage,  
 Autant expert en art de medecine  
 Que le requiert la censure Apolline :  
 Vostre beau fils monsieur de Casana,  
 Qu'en tous ses meurs chose à reprendre n'ha,

Non seulement en sa profession  
 Il est exquis, & seur en action :  
 Et de tous ars, sait differer & dire,  
 Tant doctement qu'on n'y trouue à redire.

Quant au predict mary second, Berthin  
 De Valimberg, de luy soir & matin  
 Tel traictement auez, & doulx seruice,  
 Qui uous maintient, en tous soulas sans uice.  
 Dieu cognoissant uoz amours mutuez,  
 Fecundement uous ha constituez  
 Plusieurs enfans par generation,  
 Plaisans à ueoir, pour leur perfection.  
 Si que de luy, lon dit pour abreger,  
 Qu'il sait enfans, comme monnoye forger.

Que uoudriez uous desirer d'aduantage,  
 Si ce n'estoit du monde le toutage ?  
 Que ie ne crois, car uostre charité  
 N'est desirer autrui desherité.

Pour faire fin, Dieu ça bas uous concede  
 Entierement ce que la crainte excede  
 D'aduersité, soit de corps ou de cœur.  
 Vostre mary sera pour uous uainqueur  
 De tous deffaulx, puis qu'en monnoye est maistre  
 Vostre beau fils saura remede mettre  
 Contre l'insult de griefue maladie.  
 Ainsi au cœur, & corps lon remedie.

Qui ha santé, & richesse à commande,  
 Pour cœur & corps ne faut que plus demande.



## IOYEVSE EPISTRE EN-

uoeye à Noble enfant Luquin de Valimberg,  
 fils desditz Berthin & dame Anne Turgis,

Roy des pouletz, au College du-  
 dit Bezanson, pour l'an

1556.

**R**Oy tres bening, bienheureux en naissance,  
 Roy gracieux, roy de pure innocence,  
 Roy de bonheur, & ioyeuse fortune.  
 L'omnipotent ta ieunesse fortune,  
 Pour le salut, qu'un de tes serfs t'enuoye,  
 Tant qu'une fois Roy par uertu te uoye :  
 Car si uertu ha de toy le regime,  
 Domineras non moins qu'un roy sublime.

Et nonobstant que sans lance & heaulme  
 Tu as conquis ce liberal'royaulme,  
 N'estant fondè sur fatale auarice,  
 Si tu retiens uertu pour ta nourrice  
 Elle fera, par son doulx éguillon  
 Tes ennemys marcher à reculon,  
 Et tellement, que uainqueur regneras,  
 Ayant uertu, & sur tous gaigneras.

Souuienne toy du coq uictorieux  
 Qui t'ha fait Roy triumpphant glorieux :  
 Lequel combien fut beste irraisonnable  
 Pour gloire auoir, en combat conuenable,

Il ne doubta d'estre par tant greuè,  
 Qu'en combattant, il eut un œil creuè.  
 Ce nonobstant perseuerant en gloire  
 Il feit depuis sa cinquiesme uictoire.  
 Te demonstrent par gracieux presage  
 Que si tu es bon, discret, & bien sage,  
 Tu ne lairras uertu, par monts ou uaulx  
 A l'aduenir pour quelconques trauaulx.  
 Ainsi pourras comme ce coq ranger  
 Ceulx qui uoudront te uaincre ou dommager.

Suyuant uertu, à Dieu le tout puissant  
 Donnè seras : apres obeissant  
 Soigneusement à tes bons pere et mere  
 Qui maintefois, ont pour toy peine amere :  
 Lesquelz rendras tous deux de toy contens  
 Bien employant à l'estude ton temps.  
 Lors ne faudra doubter pour ton esbat  
 Monnoye auoir, car ton pere la bat,  
 Ayant tant bien, suyuant uertu, uescu,  
 Qu'il ha pour toy necessité uaincu :  
 Ta mere aussi, dame tres debonnaire  
 Ne te faudra d'un' amour ordinaire.  
 Ilz t'ont desia (comme bons geniteurs)  
 Mis & rangè, soubs sauans precepteurs,  
 Qui de uertu te monstrent la trace  
 Si prudemment & de tant bonne grace  
 Qui ne tiendra fors à toy seulement,  
 Si de uertu tu n'has l'accolement.

Pense en apres, en ton petit cerueau  
 Sur ces habits qu'on t'ha fait de nouueau,  
 Non sans grandz frais : & qu'ilz te sont donnez,  
 Pour tous tes sens rendre un iour adonnez

A batailler victorieusement  
 Comme ton coq : mais uertueusement.  
 Fortune t'ha demonstrè doulce face,  
 Dont il conuient que vertu tout perface  
 En bien uiuant, & que tu te recole  
 Que si tu es par un coq, roy d'eschole,  
 Tu sois ainsi par ta sollicitude  
 Roy entre ceux, qui suyuront bonne estude.  
 Dieu le te doint, t'ayant au monde mis,  
 Pour contenter tes parens & amys.

24

*In eundem Luquinum de Valimbertis,  
 eiusdem Ferrici Iulyoti  
 hexastichon.*

**S**Trenua pugnacis Regem uictoria galli  
 Te statuit merito (Parue Luquine) grauem.  
 Doctiloquos studio docili uenerare magistros,  
 Quos tibi prudenter praebet uterque parens :  
 Magnanimum faciet te tandem maxima uirtus,  
 Quem modo sceptrigerum pugna iocosa facit.

25

## VERSION DVDIT

Sizain.

**D**'Vn coq hardy la feruente uictoire,  
 Petit Luquin, t'ha fait Roy meritoire.  
 Estudiant, maistres sauans uenere,  
 Que t'ont donnez tes prudens pere & mere,  
 Ainsi uertu te fera magnanime,  
 Qui par combatz ioyeux sceptre as minime.

## FACETE EPISTRE EN-

uoyee par le dict Ferry Iulyot estant  
 escholier, à une dame qu'auoit  
 • médit de luy.

**M**Adame physionomiste,  
 Que tant faictes la chatemite,  
 Congnoissant les gens au uisage,  
 Comme si vous esties bien sage,  
 Vous auez dict, ie le sçay bien,  
 Depuis ie ne sçay pas combien,  
 Que le plus glorieux i'estoye  
 Des escholiers, quand m'y mettoye.  
 Encore auez dict pis folatre,  
 Que i'estoye un opiniatre.

Je uous supplie, hola réueuse,  
 Coquarde, punaise, morueuse,  
 Me declairer l'occasion,  
 Vous mouuant à derision,  
 Composant blasons de tel sens,  
 Où de uoz uertus rien ne sens,  
 Ny ne pourroys oultre sentir,  
 Si ie m'en uouloys assentir,  
 Donner ne ueulx consentement  
 Faire si fol assentement.

Or qui uous fait (dame guenon)  
 Iargonner sur mon simple nom,  
 Me congnoissant sans me congnoistre ?  
 Vous ousez uous bien mescongnoistre,

Jusqu'à ce, que de faire harangue  
 De uostre serpentine langue,  
 Contre moy, sans uous auoir fait  
 Quelque deplaisir ou forfait ?  
 Iugez uous des gens sans scauoir  
 Qu'en l'estomach peuuent auoir ?  
 Ne scauiez uous lors plus que dire,  
 Quand de moy, uintes à médire ?  
 Au mirouer n'estiez empeschee,  
 Vous estiez lors asses leschee.  
 Car telle chose uous empesche  
 Plus souuent, qu'un pescheur la pesche.  
 Lors n'auiez soing fars composer,  
 Pour uostre tain mieulx disposer :  
 Afin qu'en retournant la face,  
 En rides ne feissies grimace.  
 Lors ne uous fut estè loisir.  
 De m'imposer nom à plaisir.

Si uoz cheueux blondz, qu'un cremacle,  
 Qui ne meritent qu'on les racle,  
 Eussies testonné, ie vous iure  
 Que uous ne m'eussiez dict iniure.  
 Car quand au mirouer regardez,  
 Respondez, si vous langardez ?  
 Nenny non, car une furie  
 N'est plus iaffre, sans menterie,  
 Que uous este decheuelee

Premier, au front estes pelee :  
 Mesmement entre les deux yeulx,  
 Les longs poilz uous y croissent mieulx,  
 Qu'au menton à l'homme la barbe,  
 Ou comme au printemps en prez l'herbe.

Sorsilz auez crespes, faroches  
 Plus espes que la mousse es roches,  
 Voz deux yeulx larges & profonds,  
 Estans dessoubz, en obscurs fonds,  
 Pour certain ne sont moins affreux,  
 Que sont ceulx d'un taureau iaffreux,  
 Vous auez un né de mochet  
 Groz, enfonsé, & à crochet,  
 Ayant ouuertes les narines,  
 Comme deux trumpetes marines.

Cornemusier n'ha bouche enflee,  
 Plus rougeatre ou ensoufflee  
 Qu'est la uostre, tant seulement  
 Si deux pas faictes bellement.  
 La barbe soubz le né uous croist,  
 Si le siseau ne la décroist.  
 Vos dens coustent moult de blanchir,  
 Et si ne les pouuez gauchir.  
 Oncques iumens uieilles dentees  
 N'en portarent de plus gastees.  
 Vous auez la bouche fendue,  
 Quasi iusqu'aux ouyes tendue.  
 Le menton n'est pas à forchette,  
 Mais correspond à tel bouchette.  
 Bien pourriez iargonner gru gru,  
 Ou en phyole manger gru,  
 Car col auez grand et nerueux.

Et qu'est ce que dire ie ueulx  
 De uoz deux aualees tetasses,  
 Ressemblans deux grandes besasses ?  
 Que uous cuidez auoir tetins,  
 Molletz, rondeletz, enfantins.

Si uous alaictes des enfans,  
 Je tiens qu'ilz seront triumphans.  
 Ou si uous deuenes grossiere,  
 Ilz uous uauldront bien gibeciere,  
 Car les deux peaulx estans tendues,  
 Seront grandz bources estendues.

L'estomach & le uentre ensemble,  
 Vous font beau busque, ce me semble,  
 Du secret ie n'y touche point,  
 Sur tant or lieu ne git mon point.

Iambes portez par tant refaictes,  
 Qu'on les extime contrefaictes.  
 Bien deuez estre soustenue,  
 Car elles sont d'une uenue.  
 Les piedz auez pointus devant  
 Comme une corbeille ou un uan,  
 Tant ilz sont groz, larges & trappes,  
 Qu'il n'y fault plus fors agues grappes,  
 Et ce seront pattes ursines,  
 Beaucoup plus qu'humaines serines.

A marcher, moins ne semblez lasse  
 Qu'une asnesse, qu'on meine en lasse.

Derrier n'estes moins contrefaictes,  
 Comme deuant, beaucoup defaictes,  
 Bossue, & de trop court coursage.  
 Point ie ne touche au gros uisage.  
 Car son orde & puante halaine,  
 Rendroit mon epistre uilaine.

Conclusion, si uous pensez  
 A uous, de ceulx qu'auront passez,  
 Comme i'ay dict, ne médirez,  
 Mais uous mesme vous chastierez :

Car en uous ha plus à redire,  
Que ie n'ay le loisir d'escrire.

Dea encour ie ne conterolle,  
Vostre gratieuse parolle.  
Vne uache uenant de boire  
Ne baue plus, que lors qu'en gloire  
Vous montez pour pindariser :  
Cuydant tres bien terminer.

Le menton auez de present,  
De uoz baues tout reluysant.  
Sommairement en uous ne scay,  
Chose que uaille un bien uieux say.

De glorieux me donnez nom,  
Pource que ie respondis non,<sup>1</sup>  
Quand uous m'inuitastes danser,  
Me pensant bien desauancer :  
Et quand ie prins ma Valentine,  
Plus eschaufree que Proserpine  
Me dictes lors opiniatre,  
Vous demonstrant acariatre.

Quel est celuy tant ébesté,  
Cognoissant uostre grand beauté,  
**Comme dessus ie l'ay compris,**  
Qu'à uous aymer seroit emprins ?  
Taisez uous, taisez uous, mutine,  
Et ne soyez tant enfantine,  
Prendre plaisir l'homme picquer  
Qui uous saura bien repliquer,  
Et tenez que si sa replique  
D'oresenauant plus fort pique,  
En topiquant sur vostre uie.  
Sur laquelle aucun n'ha enuie,



Escruiant de uous de nouueau,  
 Vous saurez qu'il ha au cerueau.

## EPISTRE *à la dame qui peine*

*Soy demonstrer trop éuolee,  
 Suyuant son nom Dame Volee,  
 Qu'a laissè son mary en peine  
 Sans d'iceluy estre foulee.*

**D**Ame qui sans droit, n'y raison,  
 Deshonnorez uostre maison :  
 Non uostre maison seulement,  
 Mais uoz alliez folement,  
 Par uostre legiere ceruelle :  
 Faut que vostre vie on revele,  
 Que ie trouue tres malheureuse,  
 Si lubrique, & si scelereuse,  
 Que uous mesme qui la menez  
 Deuez auoir sens estonnez.

Estonnez uous orde carongne,  
 Remplie de ueroleuse rongne :  
 A iamais l'on n'eut pourpensè,  
 Que par tant eussiez offensè.  
 Vostre grande bigoterie,  
 Fondee en uaine menterie,  
 Demonstroit dehors le contraire,  
 De ce que uous ha fait soustraire.

O sottte pauvre desolee,  
 Bien iustement dicte Volee,

Vous meritez aigres chastoys,  
 D'auoir laissè mary courtois  
 Pour homme Sardanapalique  
 Qui uous aprent uie diabolique.

Ayez uous mieux user vostre eage  
 A bordeler, qu'en mariage ?  
 Ayez uous mieux passer uoz ans  
 Pres ceux qui uous uont abusans,  
 Que d'estre avec uostre mary ?  
 Laissè l'avez triste & marry  
 Vous ayant plusieurs honneurs fait  
 D'un cœur entier bon & parfait.

Ayez uous mieux damner uostre ame,  
 Receuant malheureuse fame,  
 Qu'en renommee priuauté  
 Maintenir foy & loyauté ?  
 L'espoux auquel estiez liee,  
 Vous rendoit si hault alliee,  
 Que tout uostre parenté  
 En auoit credit arrenté :  
 Et par la Venerique flamme  
 Que uostre cœur lubrique enflamme,  
 Bruslant, les uostres consommez,  
 Et leur bon renom assommez.

Où l'alliance qu'auiez prise  
 Vous prisoit, elle uous mesprise.  
 Ou l'on uous disoit damoiselle,  
 Lon uous dit uerolee mezelle.  
 Lon uous nommoit honneste femme,  
 Et lon vous dit putain infame.  
 Où l'on uous tenoit simple & sage,  
 Lon uous tient de fol le message.

Lubrique uie tant uous ebeste,  
 Qu'on uous repute moins que beste.  
 Où l'on prisoit uostre maintien,  
 Doulx & courtois, par entretien,  
 L'un dit que uous estes patente  
 Ordure publique, inconstante.  
 Somme, pas uous ne meritez,  
 Que uoz uices soyent recitez.

Si le deshonneur seulement  
 Tumboit sur uous, consolement  
 Pourroyent auoir uos aliez,  
 Qu'à uous plus ne se dient liez.  
 Et pour uostre uie deshonneste  
 Certainement uous admonneste  
 De ne prendre en uous assurance,  
 Vous nommer de telle alliance,  
 Mais uous nommer uile soillarde  
 De quelque uilaine paillarde,  
 Ou d'un uérolè rufien,  
 Comme celuy trop ancien,  
 Qui par un damnable soustrait  
 Vous ha de tout honneur distrait.  
 Lequel & uous soudain tremblez  
 Pour ainsi uous estre assemblez  
 Postposant la loi coniugale,  
 Pureté, & uie frugale,  
 A Volupté mere charnelle  
 De damnation eternelle,  
 Conceüe en courage peruers.

Il me desplaist oultre en mes uers,  
 Parler de uous comme indigne  
 Vostre uie escripte n'est digne,

En balade, ny en rondeau :  
Mais en lourde prose au bordeau.

# IOYEVX CRY D'VN

Abbé inuitans ses moynes en  
l'abbaye.

**A** Vant boiteux, podagres, ueroleux  
Muetz, punais, baueux & chanceleux,  
Iouëurs, pipeurs, d'estuues les piliers,  
Borgnes, gouteux, de gourre chanceliers,  
Cocuz sachans, & qui n'en sauez rien,  
Pauuvres frelus, sans avoir terrien,  
Escornifleurs, escumeurs de marine,  
Tous morfonduz, à l'ouuerte narine,  
Vous glorieux muguetz, allans par rue  
Bien doucement, afin qu'on ne se rue  
Sur uous de faict, pour auoir la despouille :  
Et uous aussi qui sauez comme on fouille,  
Contremuant en propos flagorneux,  
Ayant les piedz pouldreux & limoneux.  
Sans declarer comment, ou ny pourquoy,  
Venez auant, ne uous tenez à quoy.

Pauures debteurs, faisant les chatemites,  
Voz crediteurs uous font plus doulx qu'hermites,  
Approchez uous, laissez debtes & rolles,  
Vous uous fachez d'ouyr telz conterolles.  
De tous estatz descirez, malempointz.  
Qu'auuez souvent chemises pour pourpains,

Et qui craignez les tailleurs de tel'sorte,  
 Qui de uoz brayes faut que chemise sorte :  
 L'abbè des bons prent pitié de uous ueoir,  
 En uous mandant, que si faictes deuoir,  
 Vous retrouver à l'abbaye dymanche,  
 Il uous uerra, & ouurira la manche,  
 Pour uous donner des biens de l'abbaye,  
 Que de vous uoir est ia toute esbaye :  
 Prenant pitié des pauvres refondus.  
 Qu'or & argent ont en fondant fondus.

Approchez uous, l'abbè pour huy s'aduance  
 De uous donner repentir pour auance.  
 Et si n'aeuz reuenus, heritages  
 Ou aultres gains, pour tous uoz aduantages,  
 Asseurement il se uente & pouruente  
 Qu'à un chascun donnera telle rente,  
 Que uous pourrez uous saoler d'abondance,  
 Ayant le pain, le uin, & la pidance.

## EPISTRE ENVOYEE A MES- sieurs les Escholiers à Dole, estans en contention.

**S**I par effect, rethorique la belle  
 Se déduyoit esmouuoir cœur rebelle :  
 A maintenir insultz bruys & alarmes,  
 Ou faire cris, plains, ou respandre larmes :  
 Mes bons seigneurs, confreres & amys,  
 La plume en main sur papier n'eusse mis,

Vous inuitant tous à paix & concorde.  
 Quand à par moy uoz scismes ie recorde,  
 Dame Raison m'exhorte & me contraint  
 Vous exciter d'ensuyure un aultre train.  
 Vn aultre train plus doux & pacifique  
 Que n'avez prins, par hayne uenefique.

Escoutez donc, non pas ma rude Muse,  
 Mais où raison sincerement m'amuse,  
 En me chargeant sans simulee parolle  
 De uous mander non pas moins que par rolle  
 Ce qu'elle entend que pour uostre bon heur  
 Vous poursuyuez, tendans à tout honneur.

Raison n'entend de uous rien commander,  
 Fors seulement de uous tous amander.  
 Raison ne ueult destruire uostre nom,  
 Ains l'exalter par florissant renom.  
 Elle ne quiert esmouuoir uoz rancueurs.  
 Pour uous monstrier les uns d'aultres uainqueurs.  
 Elle ne ueult que de uoz freres chiers,  
 Seuerement uous soyez les bouchiers.  
 Dame Raison d'une tristesse aigrette  
 De iour en iour, uoz alarmes regrette,  
 Pour peu de cas commeus et suscitez  
 Et frequemment par trop resuscitez  
 Iusques à ce, qui n'est teste ou cerueau  
 Ne se fachant d'entendre ce nouveau,  
 Qui uous rendront uous mesmes la ruine  
 De uoz espoirs, par fatale bruine.

Làs uouldriez uous, ie uous prie respondiez,  
 Perdre le but, pour lequel despendez  
 Or & argent, c'est scauoir & prudence ?  
 Pensez uous point que c'est oultre cuidance,

Cuider trouuer sauoir mouuant telz scismes ?  
 Dea pense uous estre à uertu proximes  
 De iour & nuyt, l'un l'autre escharguettans ?  
 Meilleur seroit, d'estre un peu muguettans  
 Honnestement, pres quelques belles dames,  
 Que par combatz perdre les corps & ames :  
 Ce qu'est certain, si Dieu de brief n'amande  
 Vostre uouloir, qu'oultre rien ne demande  
 Sinon tuer : puis regretz & remors  
 Ne pourront pas resusciter les mors.

Consideriez que ce n'est pas grand gloire,  
 Sur son amy obtenir la uictoire.  
 Vous estes tous (au moins le deuez estre)  
**Vrays** bons amys, que ne uouldriez permettre  
 Que l'un de uous, soit tant que uouldrez moindre.  
 Eut à souffrir, & ne uouldriez pas craindre  
 Vous employer, pour son soulagement.  
 Et maintenant trop plus qu'estrangement,  
 Ne recérchez que l'un l'autre **inuehir**,  
 Que ne uous peult à bon hoz prouehir.  
 Telz mouuemens ne seruent pour comprendre  
 Ardu sauoirs, ou beaulx faictz entreprendre.  
 Estimez uous plus estre éuertuez,  
 Si uous estiez l'ungs par aultres tuez ?

Que dient les lays, n'ayans sens, ny sauoir,  
 Lorsqu'en tel bruyt uous peuuent perceuoir ?  
 Que diront ilz ? que debauchee science,  
 Les ieunes gens esmeut à deffiance.

Trop mieulx uauldroit, qu'à iamais de doctrine  
 N'eussiez prins port, si de cœur en poitrine  
 Ne l'escoutez, laquelle n'entend pas,  
 Pour soy greuer que l'un l'autre fait pas.

Je uous supplie, à loisir discutez,  
 Depuis le temps que uous persequutez,  
 Combien auez conquestè de proffit,  
 Ou de renom ? ah que Priam ne fit  
 Trop sagement tenir bon pour Helene,  
 Sa uille en fut destruite & mise en peine.  
 Souuentes fois Cassandra neantmoins  
 L'auoit predict : mais lon en faisoit moins,  
 Par le conseil de Parys l'adultere,  
 Dont tant de gens souffrirent mort austere.  
 Raison pour huy uous est bien Cassandra :  
 Si ne l'oyez de uous lon attendra  
 Comme de Troye, annichillation.

Donnez congé à machination  
 De uangement, d'un rancueur colerique  
 Qui uous à prins comme Parys l'inique  
 Helene print : n'attendez Achilles  
 Qui uostre Troye (apres qu'annichilez  
 Vous aura tous) uienne rendre en langueur.

Las quel doulceur trouuez uous en rigueur ?  
 Où sont uoz ieux ? où sont uoz passetemps ?  
 Que faictes uous ? en cecy ne m'entens.  
 Aymez uous bien uous enlasser es las  
 De tous regretz ? estes uous de ioye las ?  
 Aymez uous mieulx uiure en acariatres,  
 Seditieux, mutins, opiniastres,  
 Que uous ranger dessoubz bonne union ?  
 Il est certain qu'une communion  
 Où paix n'ha lieu, n'est de grande duree :  
 O que paix est beaucoup plus honoree,  
 Bien iustement, que n'est guerre excessiue.  
 Prenez donc paix, laissez guerre nociue.



Et quand serez tous reconciliez  
 Sincerement, quasi comme alliez  
 Tous congnoistrez l'aise dont triste noise  
 Vous a priuè, de quoy à raison poise :  
 Laquelle alors uous congnoissant amis,  
 De toutes pars enuoyera ses amys  
 Pour faire feu de ioye, en grand triumphe,  
 Si l'un de uous contre l'autre ne grumphe.

Faictes le court, ne differez de faire  
 Ce que raison uous prie en uostre affaire.

Vous sauez bien que l'homme pacifique  
 Desia quasi est demy deifique.

Mais pour certain qui fait noise & la quiert,  
 Aux bas enfers sa demeureance acquiert.

Paix est de Dieu la fille bien aymee,  
 Et noise uient des bas enfers formee.  
 Prenez donc paix belle dame celeste,  
 Noise chassant pour euitier moleste.

## A HONNESTE HOMME MAI-

stre Claude Petremand, citoyen de Be-  
 zanson, sur le noble ieu de  
 l'arbaleste.

**A** Bon droit, amy maistre Claude,  
 D'un bon uouloir tu m'admonnestes,  
 Qu'en mes uerz un peu ie collaude  
 Le noble ieu de l'arbaleste :

Mesme pour ce qu'il est honneste.  
 Hors de rapineuse auarice :  
 Abhorrant propoz deshonneste,  
 Et rancune de maux nourrice.

Pas ne faut qu'un tel ieu perisse,  
 Qui n'induit faire aucune chose  
 Contre Dieu : mais faut qu'il florisse,  
 Soit par uerz mesurez, ou prose :  
 De ce ieu beaucoup parler n'ose,  
 Veu que par dessus tous me plait,  
 Pour louer ce qui me complait.

Si tiens ie que rien ne desplait  
 Recitè ueritablement :  
 Vn bon iuge soustient tout plaid  
 Veritable finablement.  
 Ie maintiens uray semblablement,  
 Que l'homme mortel lon peut dire  
 Vne Arbaleste proprement  
 Tendue au guindal de martyre.

Le traict mis dessus qu'au blanc tire,  
 Est l'ame des cieux descendue,  
 Qu'à Dieu comme à son but retire  
 Pour à salut estre rendue.  
 La corde guindee & tendue,  
 Est la foy que seule nous meine,  
 Par bonnes œuvres estendue.  
 De ce monde en l'heureux domaine.

Velà ce que ie te rameine  
 De l'Arbaleste maintenant,  
 Et soustiens qu'en la uie humaine,  
 N'est ieu plus de loz soustenant :  
 Ceux qui le uont entretenant

Sauent si i'en dis menterie :  
 C'est un ieu, uertu retenant,  
 Loüer le puis sans uanterie.

Rien ne s'y fait qui contrarie .  
 A Dieu, ny le prochain aussi :  
 Ce sont les deux preceptz de uie  
 Que Dieu nous recommande ainsi.  
 Sans grandz trauaulx cœur en soucy,  
 Passe en ce ieu de dueil l'outrage,  
 Duquel n'escriray plus icy,  
 L'espere en dire d'auantage.

FIN DE LA PREMIERE PARTIE

# ICY COMMENCE

## LA SECONDE PARTIE DE

ce liure, où il y ha uint-cinq matieres  
 tant en Epigrammes diminuans  
 d'un uers qu'en Epistres  
 à ses amys.

### I

*Du bien et mal : par douze uers.*

**L**E bien & mal sont les deux butz de l'homme,  
 Le pretendu, le salaire & la somme  
 Qu'en ce bas lieu il poursuyt seurement,  
 Le bien du bien, honneur & proffit somme :  
 Le mal du mal, le malfaisant consomme.  
 En l'un crainte est, en l'autre asseurément.  
 Qui sur ces pointz ueut penser meurément.  
 Se recordant du pas qu'amerement  
 Nous faut passer, sans de ce sauoir l'heure,  
 Il sera bien surprins temerément,  
 Si le mal prent, laissant legierement  
 Le bien qui rend à l'homme heureux demeure.

## DV VENDREDI SAINT ET

*la mort de nostre Seigneur Iesus Christ,**Excitation : par vnze uers.*

**L**A mort à tous, est chose espouuentable  
 Quand seulement lon en touche propos :  
 Mais la souffrir est bien plus redoutable,  
 Mesmes à ceux qu'en santé sont dispoz :  
 Pauures humains, par pechez indispoz,  
 Estoyent iugez souffrir mort gehennelle :  
 Mais Iesus Christ pour leur rendre repoz,  
 Souffre aujourd'hui en la croix mort cruelle,  
 Par ceste mort rendant uie eternelle.  
 Puis que pour nous il paye un tel impos :  
 Fondons en pleurs, c'est pour nostre querelle.

## DV COMMENCEMENT ET LA

*fin : par dix uers.*

**C**ommencement nous promet une fin,  
 Car toute fin uient de commencement :  
 Pour les passer faut estre sage & fin,  
 Soit en effect, en dit, ou pensement.  
 Bien commencer n'est grand aduancement,  
 Si l'on ne ueut perseuerant finir :  
 Ces deux en un, si ne peut lon tenir,  
 Et l'un n'est rien, si l'autre ne l'ordonne :  
 Continuer faut donc, pour paruenir  
 Iusqu'à la fin qui seule tout couronne.

4

## DE MENSONGE ET VERITE :

*par neuf uers.*

**M**ensonge Verité supprime  
 Quelque fois, & le plus souuent :  
 Mais lorsque Verité s'imprime,  
 Mensonge tellement reprime,  
 Qu'elle la fait uoler au uent.  
 Celuy qui ment, à tout euent,  
 Communément n'ha grand duree,  
 Mais en libre lieu & conuent,  
 Verité demeure asseuree.

5

## D'VN RELIEVR DE TONNEAVX :

*par huit uers.*

**V**N relieur fraploit un iour,  
 Reliant un tonneau coulant :  
 Quand de frapper faisoit seiour  
 Sa femme uenoit l'arcelant.  
 Il luy dit (son cœur decelant)  
 Decoups faudra que ie t'affoule.  
 Car tu uas mes secretz coulant,  
 Comme ce tonneau mon uin coule,

6

## D'VNE DESIRANT QV'ON

*l'appelast belle : par .7. uers.*

**V**Ous dire Belle, c'est mentir :  
 Mais uous estes bien glorieuse,

9.

Iusqu'à donner un dementir,  
 Qui uous nommeroit gratieuse.  
 Ne me soyez iniurieuse,  
 Seulement ne uous diray belle,  
 Ains mille foyz, plus que rebelle.

## 7

## DE CELLVY QVI DESIROIT

*estre premier en toute monstre : par .6. vers.*

**D**V premier rang en une monstre  
 Desire estre, afin tu te monstre :  
 Mais que te sert marcher premier,  
 Veut qu'il falloit passer oultre,  
 Frappant (où bon cœur se demonstre)  
 Tu uouldroys aller le dernier.

## 8

## DES VOILLES QVE LES

*dames portent : par .5. vers.*

**D**Ames souloyent farder la face,  
 De quoy elles ont repentance :  
 Afin que Dieu pardon leur face,  
 De grandz uoilles la ueue efface  
 Aux regardans par penitence.

## A VN AYMANT MIEVLX BOIRE

*que d'estre amoureux : par .4. uers.*

D'Estre amoureux n'est à blasmer,  
 Si par amour lon ne prent gloire :  
 Mais tu aymeras mieulx bien boire,  
 Que pourchasser te faire aymer.

## QVATTRIN D'VN QVI

*médici de chascun.*

D'Vn chascun ne cesse mèdeire  
 A grand tort : mais pour ton chastoy  
 Lon peult par reciproque dire,  
 Qu'aussi chascun médict de toy.

## D'VNE PARLANT DE SON

*mary qui mourut en riant.*

P Lus ne ueulx tant craindre la mort  
 Comme i'ay fait par le passé :  
 Car ie tiens plus dur le remort,  
 Que n'est angoisseux le passé.  
 Mon mary ce bon trespasè,  
 Viuant estoit tryste, cryant,  
 Et mourut muet en ryant.



## DV MESME

**M**On mary pendant qui uiuoit,  
 Ne me fut oncque gracieux :  
 Tousiours me battoit s'il pouuoit,  
 Faisant le melancolieux :  
 Mais il mourut riant ioyeux,  
 Comme un estant mis en lyesse.  
 Prier deuoyz dont pour le mieulx,  
 La mort pour l'ouster de tristesse.

## D'VN QVI MOCQVOIT

*vn borgne.*

**T**V te mocque de mon œil borgne,  
 Comme si i'estoys hideux :  
 Mais quand sur moy tes deux yeux torne,  
 Des deux ne uois qu'un, qu'en uoid deux.



# A PLVSIEVRS SES

bons amys de  
Bezanson.

14

## A MONSIEVR LE RECTEVR

*Maistre Estienne Desprez, son premier precepteur es lettres*

**E**N ton pré ie me suis repeu  
Commenceant mes ans de doctrine,  
Et en ay prins tant que i'ay peu,  
Pour boire en fontaine uitrine :  
C'est la fontaine Cabaline,  
A laquelle tu m'as conduit,  
Ie prie la bontè diuine  
T'en rendre ce que bien te duit.

15

## A DISCRETE PERSONNE MES-

*sire Bonaventure Iunot prestre, son maistre en escripture  
et pratique.*

**P**Remier tu m'as monstré escrire,  
Et puis apres l'art de pratique,  
I'en uouldroys bien tes loz descrire  
En mon petit fait poëtique :

Mais ce n'est present magnifique  
 Te recompensant par droicture,  
 Dont Dieu te rende pacifique,  
 Soubz ton nom de Bonaventure.

## A MONSIEVR LE COMMAN-

*deur du temple, frere Mathieu de Masso.*

L'Experience & seurt sauoir  
 Que tu demonstre en promptitude,  
 M'ha excité de mon pouuoir,  
 Vn peu recueillir mon estude.  
 Pour euitier ingratitude,  
 Ie te mercye à brief parler,  
 Tes bons propoz, qu'aller par l'air  
 Ne fault laisser, ie le resô,  
 Estimant, sans dissimuler,  
 Fort frere Mathieu de Massô.

## A MAISTRE PIERRE

*Fournier, notaire.*

M Aistre Pierre bien priuement,  
 De ces huicts uers te fais estraine,  
 Pour maintenir naifusement  
 Tousiours nostre emprise ancienne :  
 Dieu tout puissant la nous maintiene,  
 Nous donnant de uertus grenier,

Pour faire bon pain de sa graine  
Car tu es beau puissant fournier.

## AV SIEVR IEAN MALARME.

**I'**Ay entendu depuis n'a guere  
Qu'entrepris auoys de marcher  
(Laissant marchandise) en la guerre :  
Mais pense bien à ce marcher.  
A plusieurs il couste bien chier,  
Voire iusqu'à laisser la uie.  
Touteffoys pas ne t'en deuie  
Car tu es fort dextre estimè,  
Combattant qui te porte enuie,  
Combien que tu es malarmè.

## A MONSIEVR FRANCEOIS

*Malarmè son frere.*

**C**Oeur cordial, & bonne grace  
Sont deux choses fort estimees :  
De guerre ne suyuent la trace  
Chassant de courroux les fumees.  
Ce sont uertuz en toy fermees :  
Car afin que tousiours franc sois,  
Tu crains tant noises diffamees,  
Que tu es Malarmè Francois.

## A MAISTRE IEAN

*Renaud, notaire.*

**C**Rains tu d'estre le bien uenu  
 En amour ? ce seroit simplesse :  
 Moindre que toy est paruenue  
 Soit en beauté, ou par adresse :  
 Aucun destorbier ne te dresse,  
 Et moins contre moy se rebarbe:  
 Il n'est dame que ne s'adresse  
 A t'aymer pour ta belle barbe.

## AV SEIGNEVR ESTIENNE

*Sauget.*

**L**Ong trauail te promet repos  
 Par alternatiue muance,  
 Mais comme d'amours es suppos,  
 Ce repos sera iouyssance,  
 Où par amoureuse alliance  
 Auras laborieux obietz,  
 En fin, naturelle puissance  
 Te rende des petitz Saugetz.

## A MAISTRE IEAN CHAMPFROID

*ayant presté des liures audit Iulyot.*

VN plaisir fait ne se perd point  
 Mais en le faisant moult profite,  
 La recompense uient appoint,  
 A celuy qui la fait bien uiste.  
 Le prest que tu me feis m'incite  
 (Bon amy maistre Iean Champfroid)  
 Qu'ayant ueu tes liures, recite  
 Tu n'es en bon sauoir Champ froid.

## D'VN RICHE CHICHE

C Hascun me dit que tu es riche,  
 Je ne say si tu as du bien :  
 Mais ie te cognois si treschiche :  
 Que sur ma foy ie n'en crois rien.

## D'VN QVI TROVVOIT

*en tout à reprendre.*

S Auuè ne seras, ny damnè,  
 Cela de toy lon peut comprendre :  
 Si Dieu t'auait salut donnè,  
 Encor le uouldrois tu reprendre.  
 Lucifer ne te ueut pas prendre  
 En son enfer, quoy qu'il luy poise :  
 Contre luy combat pourrois prendre,  
 Et il est ia trop las de noise.

## FERRY IVLYOT AV LECTEUR

**P**Rens s'il te plait contentement,  
Lecteur, de mon aprentissage.  
Lon ne trouue frequemment  
Si tost en art, aprenty sage

Tout a loysir

1556.



# HVIT POEMES

par Iaque Estauge.

## I

*A l'auteur : où la devise Latine de l'escuyer Ludin est  
comprinse en la premiere  
lettre des uerz.*

**A**V nom de Dieu auons finy  
Vostre liure, monsieur Ferry.  
Gloire y auez qui n'estaindra,  
Et grace que nul n'attaindra.  
En tous uos uerz, tout l'uniuers  
Tirera sens : sans rien peruers  
Dégouster là. La uoye on uoit  
Et le chemin de bien, tout droit  
Librement en uostre facture :  
Effect tousiours suyt sa nature,  
*Auge, c'est qu'on l'amplifie :*  
*Et dele, s'il falsifie.*



## ET ICY CELLE DE L'AVTEVR

*en uers Alexandrins.*

**O***N dit communément, en dicton ancien,  
 Mieulx uault auoir amys, qu'autre bien terrien.  
 N'ayant donques égard, à gain, mais à seruir,  
 J'ay fait du mieulx qu'ay sceu, pensant bien desseruir  
 Auancement uers uous : afin d'estre enrollé  
 Pour uostre seruiteur, petit uieil, enrrouillé :  
 En attendant qu'un iour, me rendray plus poly,  
 Rescruiant aux amys, en carme plus ioly.  
 Oysiueté me fuit, pour bien ranger mes uerx :  
 Compression me suit, à tours & à trauers :  
 J'espere non portant, quelque iour bon repos.  
 Vous le doint Dieu aussi, en corps, en ame & oꝝ,  
 Mais sur tout, à loysir, ne tairay uoz grans loz.*

Omnia per ocium.

## ET ICY LE NOM DV MAI-

*stre des monnoyes : aussi en uerz  
Alexandrins encomisez.*

Vrbi,

**B**Ezan son bonne uille, las que ne t'ay ie ueu ?  
Estimee es à l'Isle, dont i'ay tant souuent leu :  
Representant tel bruit, bon loz, & nom tant noble,  
Tant qu'un tel nom te duit, Rome ou Constantinoble.  
Hantee de Chrestiens, mieulx que Byzuntium,  
Inscript on ha les tiens, ceulx de Byzuntinum :  
Ne faisant mixtion de diuerse action.  
Dieu te doint, ô Citè, tout le bien que desire,  
Et toute aduersité, sur les ennemys tire.

Ciuibus,

**V**Ous auez (chascun sait) belles & bonnes dames :  
Anne Targis en est, & tant de braues femmes :  
Luquin de Valimbourg, des premiers de ieunesse,  
Il meyne soubz son bourg grand suytte de noblesse :  
Monsieur Berthin qu'on dit Maistre de la monnoye:  
Bref, gens de grand credit que nommer ne sauroye,  
En uoz murs sont comprins, Imperiaulx & gentz,  
Riches, doulx, bien aprins, bons, sages, diligens.  
Grace puisse ie auoir, d'une fois uous y uoir.

Berthin de Valimberg.

## DV AMPLE DIOCESE

*de Bezanson.*

**S**I deuons croire aux escriuains  
 Doctes, fideles & non uains :  
 L'archeuesché de Besanceon  
 S'estendoit par telle faceon,  
 Qu'entre Alemagne & la Gaule,  
 Vn pont du Ryn, comme une gaule,  
 Touchoit cesdictes nations,  
 Ayant deux iurisdicions,  
 De Bezāson, & Constance,  
 S'entretiens par constance,  
 Si qu'une Bale en auoit deux  
 Longtemps en paix. Mais (ô bons dieux)  
 Tout est changé : las, maintenant  
 Ne say plus quel bout ua deuant.

## ANNVS, VRBES,

*dies, mensis.*

**Q**Vinze centz, cinquāt' huit bons ans  
 Enbalez mande, pour Bezans :  
 En tel iour que furent gemeaux  
 Pollux & Castor nez tant beaux,  
 Et qu'Apollo pres son Taureau  
 Cerchoit aux Indes passer l'eau,

## A L'AVTEVR

Le sens  
Consens  
Et motz exquis  
Enuers  
Vos uerz  
Pay icy mis.

Si, non  
Pour bon,  
Mon priz est prins,  
Laissez  
Laissez  
Qu'ont mal aprins.

Mais si  
Aussi  
L'effect uous plait,  
Mandez :  
M'aurez  
Amy, sans plaid.

## AV LECTEVV.

Du bien  
Non mien  
Qu'au Liure on uoit,  
Ie tien  
Qu'en rien  
Nuyre ne doit.


Plustost  
Bon goust  
Y trouueras,  
Que coust  
Dispoust  
Débourseras.

En don  
Si lon  
Bailloit cecy :  
Selon  
Ce, on  
Dit grammercy.

## A CHASCVN.

Pour se baigner en la Fontaine  
 D'où l'on tire Eloquence saine,  
 Hommes, femmes, sains, ieunes, uieulx,  
 En peuuent tousiours ualoir mieulx :  
 Les fiers brutaux, malings, mocqueurs,  
 Ont leur baing Phlegethon ailleurs.





ACHEVÉ D'IMPRIMER  
SUR LES PRESSES DE NOEL TEXIER


Typographe à Pons

*Le dernier jour de Mars 1883*



POUR LÉON WILLEM, LIBRAIRE  
*A PARIS*







COLLECTION COMPLÈTE EN 14 VOLUMES ELZÉVIRIENS

## TRÉSOR

DES

# VIEUX POÈTES FRANÇAIS

PUBLIÉ PAR MM.

BECQ DE FOUQUIÈRES, PR. BLANCHEMAIN,

CH. BRUNET, A. DE MONTAIGLON,

RENÉ DE MAULDE, ETC.

### *Titres et prix des ouvrages :*

Œuvres de J. de la Taille, seigneur de Bondaroy, 4 volumes. Papier vélin : 20 fr. ; Hollande : 32 fr.

Œuvres poétiques de Guy de Tournai : *Paradis d'amour*, les *Mignardises amoureuses*, etc. 2 volumes. Vélin : 10 fr. ; Hollande : 16 fr.

Œuvres poétiques d'Amadis Jansyn. 2 volumes. Vélin : 10 fr. ; Hollande : 16 fr.

Les Restes de la guerre d'Estampes, épigrammes d'Hénault de Danjouss. Un volume. Vélin : 7 fr. ; Hollande : 12 fr.

Les Muses, enseignements et proverbes de J.-A. de Bauf. 2 volumes. Vélin : 10 fr. ; Hollande : 16 fr.

La légende joyeuse de Maître Pierre Fallu, par Bourdigné. Un volume. Vélin : 5 fr. ; Hollande : 8 fr.

Les Nœls et Chansons françaises et patoises savoisiennes de Martin, 1553. Un volume avec musique en fac-simile. Vélin : 5 fr. ; Hollande : 8 fr.

Les Éloges de la Belle Fille lamentant sa virginité perdue, par Ferry Julyot, 1557. Un volume avec gravures sur bois. Vélin : 6 fr. ; Hollande : 10 fr.

Imprimerie de Bonn (Charente-Inférieure). — Noël Texier

